

ASO LUA, 8 OKETOPA 2013

Na tauaofia le Fono Aoao Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2013.

Na nofoia le Nofoa e le Fofoga Fetalai i le itula e 9:00 i le taeao.

Tatalo.

MALELEGA MAI LE AO O LE MALO

Na fofogaina e le Fofoga Fetalai le Malelega mai Lana Afioga Mamalu, O Le Ao o le Malo.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliega i le Fono Aoao Faitulafono e iloiloaina ai Tulafono Tau Faaofi ua faaalua iinei:

1. Tulafono Tau Faaofi o Auaunaga Lagolago Faa-Soifua Maloloina 2013.
2. Tulafono Tau Faaofi o le Faalapotopotoga Faavae e Unaia le Soifua Maloloina Lautele 2013.
3. Tulafono Tau Faaofi o Teuteuga o le Tulafono o Eleele, Fuagafanua ma le Siosiomaga 2013.
4. Tulafono Tau Faaofi o Teuteuga o le Tulafono o Soligatulafono tau Leoleo 2013.
5. Tulafono Tau Faaofi o Teuteuga o le Tulafono o Fomai 2013.

TUUIINA ATU i lou nei Lima i lenei aso 7 o Oketopa i le tausaga 2013.

(Sainia): Tui Atua Tupua Tamasese Efi
O LE AO O LE MALO”.

SAUNOAGA FAAFEILOAI A LE FOFOGA FETALAI

FOFOGA FETALAI: E manatu e muamua ona ou taia le vai manino ma ou vaisausauina paia mauuluga o lenei taeao fou, aua e talitonu ua pei o ni puao e utu i timuga le alofa ma le agalelei o lo tatou Tapaau Sili i le lagi ua mafai ai ona tatou aofaga potopoto ma tatou aulia manuia mai lenei aso fonu o le Fonousu a Samoa. E manatu foi o lea ua nofo tofiga paia na tofi, paia na atofa ma paia na lupe aua le mauuluga o lenei Maota i le afio o lau Afioga i le Taitai o le Malo ma lau Kapeneta mamalu, faapea Afioga i Minisita Lagolago, lau Afioga i le Taitai o le Itu Agai, le Sui Taitai ma sui usufono mamalu uma o le Maota Fonu o Samoa. Le paia i Faauluuluga o Matagaluega a le Malo ma Faalapotopotoga i tupu ma e'e, tamalii ma failauga, saoa ma tamaitai aemaise le malosi o le nuu o lo o outou tautuaina le atunuu i ona vaega eseese.

E faafeiloai atu i ona tulaga aloaia, affio maia, maliu mai ma tala mai aao i lenei aso. E talitonu o le alofa o le Atua ua mafai ai ona tatou fesilafai i lenei taeao fou i la tatou fonu tuua e pei ona faamuta mai ai la tatou fonotaga i le masina ua tuanai atu; faafetai i le Atua ua toe maua le tatou feiloaiga manuia i lenei aso fou.

E faapena foi ona faatalofa ma ofo alofa atu i le tapuaiga a Samoa i ona tulaga faalupe. Samoa e, matou te talitonu e leai se faiva e manuia pe a le tapuaia. O oe o le poutu e faalagolago i ai poulalo o le fale o le atunuu, matou te talitonu e pai mai pea le faamafanafanaga o a outou tapuaiga ona o lo o outou po pea le fala i la outou tatalo le leoa.

E faafetai atu foi i le aufai-tatalo a lo tatou atunuu i so o se Fata Faitaulaga aemaise la outou galuega tatalo o lo o to ai manu mo lo tatou atunuu, aemaise le faamanuiaga mai le Atua. Alo maia le Palemene, e manatu o le a faasolo a tatou galuega i lenei aso aua le faaauuina o a tatou galuega tuua mai lea masina i lea masina.

ISI FAASILASILAGA A LE FOFOGA FETALAI - 1

POLOKALAME FAAPALEMENE MO TAMAITAI MA TINA O LE ATUNUU.

FOFOGA FETALAI: Mo le silafia e lenei Maota, ua tatou faatasi i le taeao nei ma le paia mauuluga o faletua ma tausí, saoa ma tamaitai ona o le Polokalame Faapalemene o le Unaia o le Faataua o le Sao o Tina i totonu o Upufai o Malo.

O le manulauti atoa, o le faamalamalamaina lea o tu ma aga Faapalemene a Samoa ina ia malamalama i faiga faavae Faapalemene aemaise le faatinoga o galuega Faapalemene i le tulaga aloaia. O se taunuuga o lenei faamoemoe o le a tulimataia, o le fausia lea o se auivi o polokalame a le Palemene e fesoasoani ai i sui tina e fia tauva i faiga palota i le lumanai aua mataupu o lo o fia faamalamalamaina i faiga Faapalemene. O lenei faiga paaga ua tuu faatasi ai aao o Malo Afaatasi, le Malo o Ausetalia ma le Palemene o Samoa. Ou te manatu o se avanoa lelei lenei e faafeiloai atu ai ma le faaloalo tele ina ia maua ni ao o manu o Malo i la outou sailiga tofa. O le tatalo, ia

tutumu pea a outou utu i lenei aso ma le tatou mafutaga i aso e lua ua fuafuaina.

Ou te tatalo atu i lo tatou Maota ina ia tuu faatasi o tatou aao ma ave se tatou pati mo a tatou malo i lenei taeao fou.

Na faaalua le faaaloalo o le Palemene i le patipati o latou aao e talia aloaia ai le faatasi mai o Tina ma Tamaitai o le Atunuu i totonu o le Maota.

SAUNOAGA FAA-MINISITA A LE PALEMIA (T.T.56)

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Ou te masalo e leai se isi taimi e tataua ai ona ou tulai atu e avea ai au ma sui o le Maota lenei. E fia piiama foi i le faafetai i le Atua i lenei taeao fou i le faamaoni o Lona alofa tunoa e pei o Ana Afioga, aua e fou Lona alofa i taeao uma.

E momoli atu foi le faamalo a lenei Maota i sui usufono mamalu uma lava ona o lea foi ua tatou feiloai i a tatou galuega i lenei taeao vaeatu le faafofoga tapuai mai a lo tatou atunuu i le talitonuga maumauai, o lo o lelei mea uma ia Iesu e pei o upu o le Viiga o le Atua a le EFKS, ae fai mai foi upu o le Viiga o le Atua a le Metotisi, “E lelei, e lelei le Alii.”

Lau Afioga i le Fofoga Fetalai, ou te tulai atu ma le ava tele e fia piiama i lau saunoaga faafeiloai i tina ma tamaitai ua tatou faatasi i lenei taeao fou, vaeatu suafa ua papale ai le tóatele aemaise o augafaapae.

E le faaluaina le saunoaga a le Maota ua malele i ai lau Afioga i le Fofoga Fetalai, ae na ona ou faailoa o galuega lagolagosua a le Malo i le faataua o le sao o tina i totonu o so o se vaega o lo tatou atunuu ona o lea ua matua aliali manino i le tóatele o Faauluuluga o Matagaluega ma Faalapotopotoga a le Malo, aua o i latou lava o nisi o tamaitai aoaoina o le atunuu.

E le i mamao ona pasia e le Palemene lenei le Tulafono e faamautu ai le 10% o sui usufono o lenei Maota e tataua ona umia e tina. O le mea moni e le o ni faiga ia e tau faia pe a fua i le soifua saili malo o tamaitai o Samoa e le gata i Talatuu ma Tala Faasolopito o le atunuu lenei, a o le soifua tautua malo i totonu o Matagaluega ma Faalapotopotoga a le Malo. Ona pau lea o le itu o Faigamalo o lo o faaitiitia ai le numera o tamaitai o i nei i le Palemene, ae maualuga le manatu e tele se suiga e faaono tulai mai i le 2016.

O le mea e ao ona silafia lelei, o le siitia o le numera o tamaitai i totonu o lenei Maota, e faamoemoe i le soifua finafinau o tamaitai ma le agaga o le fia auai i le faiga o tonu o le Malo o Samoa. E le o se agaga ina ia tuuitiitia ai outou tiute e masani ai tina o Samoa i le atiaeina o aiga ma vaai le fanau ina ia soifua lelei, aua o meaalofa ia a le Atua ia i tatou uma. E le o faapea atu la le Palemene lenei ia tuu la outou galuega lena. Afai lava e ave la outou faamuamua i le mea lena, ave i ai le faamuamua aua a outou faaluaina, o le agasala lena i luma o le Atua.

Mo i latou ua tupu ae le agaga ua tataua ona fai se sao ona ua faiava ma nofotane fanau ma ua uma foi le meaalofa a le Atua na tuuina atu ia te outou, toe pau le mea lea o lo o totoe o le faaoga o le soifua e tautua ai i le atunuu i nisi lava auala, o le taimi la lena – po o outou foi ua misia le pasi ona ua leai lava ma se tane o toe mafaufau atu ia te outou, o tulaga na ou te le toe tau fai atu. Afai e fia fai se sao, faaoga le meaalofa a le Atua.

O le 10% ua na o se faiga e fesoasoani atu ai le Malo e faatupu manatu ma faaosofia lagona ina ia finau ma saga finau aua e le taumateina le taua o sao o outou e tusa ai o tonu fai o Samoa. E le fesiligia foi ona e i ai taimi e fai ai tonu a tama, ae moomia foi tonu a tina e afea ai foi nisi o tulaga taua e le amanaia e tama.

O lou tulai atu e faamalosiaua ia te outou o i ai ni lagona mo le Faiga Palota o le 2016. O le mea moni e le faigofie aua e i ai taimi e oo lava i lou aiga e afea e tala a tagata, a o luitau uma na o le valaauina faa-Taitai. E le o se tala e faavaivai loto, a o le tala e faamalosiaua ona e le o se galuega mo e vaivai, a o le galuega mo e malolosi o le amo o le mamafa o le tautuaina o Samoa. Ia manatua o le valaauina o se faatonuga faapitoa mai lo tatou Matai; e le mo tagata uma ae na o e ua filifilia.

E muliai i sa matou tala, ia manuia tele lo outou faamoemoe ma ia tulai mai ia te outou ua tatou faatasi i lenei taeao ni sui usufono malolosi o lenei Palemene i le lumanai. Soifua ma ia manuia.

FOFOGA FETALAI: Malo faafetai le saunoa i lau Afioga i le Palemia.

Afioga Hon Palusalua Faapo II (Taitai o le Itu Agai): Lau Afioga i le Fofoga Fetalai, ou te tulai atu ma le faaaloalo.

FOFOGA FETALAI: Malie lau Afioga i le Taitai o le Itu Agai e le faatagaina se felafolafoaiga i le mataupu lea.

Afioga Hon Palusalua Faapo II: Ou te faaluaina le saunoaga a le Afioga i le Palemia.

FOFOGA FETALAI: Le Taitai o le Itu Agai, o le a ou tuuina atu le avanoa i le taimi talafeagai.

Lau Afioga i le Taitai o le Itu Agai, ia e malie o lea e filogia lo tatou Maota ina ia vaai mai tina e te usitai tele i le Fofoga Fetalai, ae leaga lou tulai mai ona faapea lea ua lima taitaiseseina le tatou Fono i lenei aso.

ISI FAASILASILAGA A LE FOFOGA FETALAI - 2

IUGA A LE FAAMASINOGA I LE VA O LEOLEO MA LE AFIGA TOELESULUSULU CEDRIC POSE SALESA SCHUSTER MA LE AFIGA O SATAPUALA.

FOFOGA FETALAI: Mo le silafia e lenei Fono Aoa, ua maea le Faaiuga a le Faamasinoga i le Mataupu i le va o Leoleo ma le sui usufono o le itumalo faaalaalafaga o Aana Alofi Nu.3 ma ua faamaonia mai nisi o moliaga o le sui usufono mamalu.

E le pogisa faiga faavae a lenei Maota pe a tulai mai mataupu faapenei. E ui lava i lo tatou va fealoaloi, ae le mafai ona tuu aunoaina ai lenei mataupu ona e tataua ona faagasolo tuutuuga ua aiaia ma mulimulitaia i faiga faavae ina ia atagia pea faiga manino ma faiga malamalama o lo o lima taitaiina ai Faigamalo lelei ma le faatinoga o le amiotonu i lenei mataupu, ina ia

tausolomua pea i tatou o Taitai o Samoa ina ia faatino ma vaavaai i le faatinoga o le amiotonu.

O lo o manino i le Fuaiupu 4 o le Tulafono Tumau 14, Tulafono Laitiiti o Amio Taualoa Faapalemene e faapea, “O le solia o lenei Tulafono Laitiiti o le a ono tagofia e le Komiti o Tulaga Aloaia ma Amio Taualoa po o e pei ona o le a fuafuaina e le Palemene.”

Ona manatu lea o le Fofoga Fetalai, ona o le leai o ni taiala manino e agavaa ai le solia e sui usufono o le Tulafono Laitiiti mo le faasee atu i le Komiti o Tulaga Aloaia ma Amio Taualoa, o lea ou te tuuina atu ai lenei mataupu i luma o le Fono Aoaofaitulafono.

Ou te tuuina atu le avanoa lenei i le sui usufono mamalu mo Aana Alofi Nu. 3 e tulai mai.

Afioga TOEOLESULUSULU CEDRIC POSE SALESA SCHUSTER (Aana Alofi Nu. 3): Faafetai i lau Afioga i le Fofoga Fetalai mo le avanoa.

Lau Afioga i le Fofoga o le Fono ma le mamalu o le Fono Aoaofaitulafono, e faafetaia pea le alofa o le Atua ua mafai ai foi ona tatou fesilafai i le soifua maua ma le lagi e mama, aua sa o tatou vao eseese i feau ma galuega, ae ua tatou toe penei ona o Lona alofa laveai.

Lau Afioga i le Fofoga Fetalai, ou te taliu i le vaatiu ae popoe le taofi, ne’i meaane ua le taalili i le vasa ae talipisia uluulu o laau. E naunau fiaseu foi le atutia, ae lilia o ta tino, aua e filifili naua le vaosa o Samoa. E pei o le upu tatou te masani ai, e momoo i le lupe ae fefe i le gata, e manao foi i le ufi ae fefe i le papa. A o le alofa laveai o le Atua Silisiliese e magalo ai se leo.

Lau Afioga i le Fofoga Fetalai e faatulou atu, e faatulou atu foi i lau Afioga i le Palemia ma le Kapeneta. E faatulou atu i le Taitai o le Itu Agai, aemaise o le mamalu o sui usufono o le Maota Fono o Samoa. Ou te faatulou atu foi i le faafogafoga tapuai mai a Lana Afioga Mamalu O Le Ao o le Malo, le Afioga i le Sui Ao e faapea le paia o Samoa ua talafaauto, e faatulou atu foi i le Afioga i le Faamasino Sili ma le mamalu o le Faamasinoga. Lau Afioga i le Fofoga Fetalai e faatulou atu foi i le paia ma le mamalu ua sasao nei i le Maota i Tina ma Tamaitai ua faapea ona tatou aofia.

Lau Afioga i le Fofoga Fetalai, e faaoololomaau se leo e avatu ai malu i puega i lau Afioga i le Palemia, le Kapeneta, lau Afioga i le Fofoga Fetalai ma sui usufono mamalu o le Maota Fono o Samoa, aemaise o le faafogafoga tapuai mai a Samoa, ona e le o toe lilo i le atuvai se vaivaiga o lou nei sui usufono i le faatinoina o tiute ua tofia ai i le Maota nei e tusa foi o nisi o tu ma aga lē tautamalii e pei ona e saunoa i ai. O le mea moni, e le mafai e se upu molemole ona toe faalanu le mea ua tupu. O le ipuvai foi ua masaa e le toe maua mai, ua na o le Mana Faaola o le Atua Silisiliese e mafai ona faalauleleiina finagalo ua oia ma mafatia ona o le mea sa tulai mai, ae o le tatou avafatafata ma lo tatou sootuli faatamalii, e tumau pea i le agaga.

E faamalulu atu i lau Afioga i le Taitai o le Malo, e silafia e le Atua e leai se agaga o lou nei sui usufono e faatu se fou i lau Afioga ma le Faigamalo. E avea foi lenei avanoa lau Afioga i le Fofoga Fetalai, ou te faamaualalo atu ai i se tu ma se aga le taulaulu ma ua le tautamalii i le silasila a Samoa, po o se upu foi sa tāia i lau fita faafogafoga. O le tatalo vaivai, ia malu avea i fale i lau tofa faatupu ma lau faautaga tausii vaatele. O le tuumumusu a le aumatutua, a ua sala tai, ia tonu uta, a ua vale utumua, ia tali utamai. A o moomooga o le agaga, ia tatou aluluga i le alofa, ae aafu i le fealofani.

Lau Afioga i le Fofoga Fetalai, o se lagona vaivai lea o lenei sui usufono, e tauala atu i lau Afioga i le Fofoga Fetalai, ia usufono mai le Agaga o le Atua, ia tautoaluaina i tatou uma, ina ia faaae i manu filigatofaga a le Maota nei mo le lumanai o Samoa, faafetai.

FOFOGA FETALAI: Ou te manatu o lea ua faafofoga manino le Maota aemaise le faafofoga tapuai mai a Samoa i ona tulaga faalupe. O lea ua folasia i malae ma faailo le faamaualaloga aloaia a le sui usufono mo Aana Alofi Nu. 3 aemaise lona itumalo, e ala i ni feeseeseaiga ma ni mataupu na tulai mai. E manatu ai le Fofoga Fetalai e le omiomia faaniu aleale pe ufiufi faamanuiti taualumaga o mataupu faapenei, leaga na aafia ai le paia o Samoa aemaise le tatou Malo. O le ala lea o lou tuuina atu o lenei mataupu i luma o le Laulau a Fono i tulaga aloaia i le tatou Palemene i lenei taeao mo lo outou silafia. O lea lau Afioga i le Palemia ma le Faigamalo, aumaia le tofa.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai faapea foi le mamalu o le Maota nei, o lea ua e saunoa faamalamalama i le mataupu ua folasia i lumamea aemaise faiga faavae o lo o limataitaiina ai le tatou galuega, ma ou te momoli atu foi le faafetai i lau Afioga, ona o lo o e tata i le moa o le ala e tusa ai o ou tiute faa-Fofoga Fetalai, aua o lo o silasila maimoa ma faafofoga ma faamasino mai Samoa pe tatou te tausii i a tatou tautoga na fai ma mulimuli i a tatou tulafono na tatou pasia i totonu o le Maota lenei.

O lenei foi la taeao, o lea ua faafogafoga manino le Maota i le faamaualaloga ma le faaoololomaau a le sui usufono mamalu i le taeao lenei. A i ai se tasi o lenei Maota e manatua au upu i le taeao na tauaofia ai le Palemene i le aso 21 o Aokuso i le 2012 i le mataupu lava lenei, na ou matua faamanino ai faapenei, “E le mafai, le mafai, le mafai ona tuuaunua e le Palemene lenei se sui usufono o le Maota nei e tausolomua le usui o faiga ma faatinoga e lepeti ai le filemu o Samoa ma atagia ai se tulaga mataga e tauvatea ai le Maota lenei.” Na ou faamamafa foi i lena taeao, e le lilo, e i ai le malosi o le Palemene lenei e faataatia ai ana Tulafono Tumau ae agai loa e tagofia loa lava sana faaiuga tuusao mo lenei mataupu. E le tau faamatalaina atu foi le i ai o le vaega toatele o lenei Maota i le Malo, ua matua nofo sauni uma e faia se faaiuga ogaoga i le sui usufono o lo o aafia, peitai, ua i ai le talitonuga e le o le musumusuga lea na mafua ai ona faasee atu le mataupu i le Ofisa o le Loia Sili ma tuuina atu ai i le Faamasinoga.

Lau Afioga i le Fofoga Fetalai, o lea ua oo lava i ooooga o le tulafono le mataupu lenei, a o le agaga moni lea na naunau ai e lafo le mataupu e fai le galuega a le Faamasinoga, ina ia faataua e tagata uma le usitaia o le tulafono e nofo lelei ai foi o tatou tagata i lalo o le tulafono. O le saunoaga a le Fofoga Fetalai, ‘o le maa faafuagalu e folau ai le Maota lenei. Ae ua ou tulai atu ona o le faaoololomaau a le sui usufono i lou tulaga faa-Taitai o le Malo ma lenei Vaega Faaupufai, ou te faasilasila atu ai ua ou talia i le agaga lelei ma le loto faamagalalo. O uiga ia o a tatou tu ma a tatou agaifanua. O le a lava le matuia o le sala, e i ai lava le avanoa mo le faamagaloga. E ogatasi ia tu ma ia aga aloaia a lo tatou atunuu ma le fatu o le galuega a lo tatou Alii Faola, o le alofa ma le loto faamagalalo. Ou te manatu ai o upu ia o lenei taeao, aua o ai se e fai mai e alofa i le Atua ae ita i lona uso, o le pepelo lava lea.

Lau Afioga i le Fofoga Fetalai, o lea ua tau le ai, e aoga foi mea e tutupu e toe fatuai ai le soifua ma le ola, ma ua ou lagona ua lava lea, ma ua aumai le Faaiuga a le Faamasinoga, tatou ave lea i uta, a o aoaoga o lenei mataupu, ia fatufatu ai le malosi e savali punouai ai pea i luma ma le tautuaina o lo tatou atunuu, ae iu ai mea uma i le viiga o lo tatou Matai. Ia faamanuia mai le Atua i lenei Maota faapea le tapuaiga a Samoa, soifua.

FOFOGA FETALAI: Malo, faafetai saunoa i lau Afioga i le Palemia. Ia leaga o lea e tulai mai le Afioga i le Taitai o le Itu Agai, o le a tuu atu le avanoa i lau Afioga i le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai aemaise foi le paia o le tatou Palemene nei.

Ou te tulai atu ma le faaaloalo e faaleagatonu ai le saunoaga a le Afioga i le Palemia, aemaise foi o lea e afifio ma papaaao sui maualuga o tina ma tamaitai, o faletua, tausii ma saoa. Pau lava le tala a lenei itu e fonofaapipii i le saunoaga a le Afioga i le Palemia, ia manuia le faamoemoe aua le alo atu i ni taumafaiga e pei ona pasia ai e le Maota nei le manulauti ina ia toatele ni tamaitai i le Maota i Tiafau nei.

O le a fana tonu le malama e tusa ai ma le tofa manino ma le tofa faale-Atua e pei ona saunoa i ai lau Afioga i le Palemia i lenei taeao. O lea ua fati magalo le ava nai Salemuliaga ona o se tu ma se aga a se sui usufono o lenei itu, le sui usufono mamalu mo Aana Alofi Nu. 3. Ou te le tau selu atu i lau Afioga i le Palemia, ou te le faafuluina foi le pa-aina, e le tau laeia foi le maa osofia aua o lau Afioga o le tautai matapalapala i taeao faapenei, aua o lau Afioga o le Taitai o le Malo pei ona e saunoa, o le Taitai o le Vaega tóatele. Po o fea lava e lilifa i ai, leai o le Afioga tutasi e faia le faaiuga. Peitai o lenei taeao, o lea ua ola le pagota. Fai mai le Afioga a le Atua e pei ona e saunoa, “Pe e te tautala i gagana a tagata atoa ma agelu ae leai se alofa, o le sumepalo tagitagi.” Ae fai mai Fetalai a Iesu e tusa ai ma le feau o le Talalelei, “Ia e alofa i le Atua, ia e alofa atu foi i lou uso a tagata e pei lava o oe ia te oe.” A o lana toe saunoaga i luga o le satauro, “Ia maua e lana fanau le fealofani, ia tatou fealofani.”

Faamalo faafetai le tofa i lau Afioga i le Palemia, se ua e togi le lagatila, ua faafao le tualima ua faamalo le fai o le faiva. Faafetai i lou manatu i le Itumalo aemaise le tapuaiga a Samoa. O le Faavae o Samoa, e Faavae i le Atua, e faavae i tu ma aga a le tatou Atunuu. O le Faavae lea o lea tatou te sapi ai nei ma maua ai e Samoa le filemu ma le toamalie. O le taiala foi lena e fofo ai faafitauli e feagai ma Samoa, o le soalaupule i le avafatafata, le ava faatamalii ma le faafaleupolu. Peitai ua oo lava le mataupu i le Faamasinoga, e le toe i ai se isi o aisili, e tatau ona tatou amanaia le usitaia e tusa ai ma le Tulafono o le a avea foi lea ma taiala i o tatou nuu ma afioaga aemaise o Samoa. O le mea lea lau Afioga i le Fofoga Fetalai, e avatu ai le faamalo ma le faafetai i lau afioga i le Palemia, ona o lou loto faamagalo aemaise lou silasila i le toafilemiu o le atunuu e amata atu i le Palemene. Lau Afioga i le Fofoga Fetalai, tau ia ina ia alofa le Atua ia utupupuina pea le tofa faale-Atua i lau Afioga i le Palemia aemaise le tatou Faigamalo.

Lau Afioga i le Fofoga Fetalai, o lau Afioga o le pule o le Maota nei, o le pule tutasi, ae ana le seanoa foi lou silasila i le Atua ma lou finagalo, leaga ou te manatua lava ni Paeaiga ua tuanai, e fai lava le finagalo o le Fofoga

Fetalai. Ou te le faaviivii atu, ae na tutuli lava nisi e fai palota laiti a o lumanai le palota tele. Ae a lenei taeao? Ae a le tofa faale-Atua lau Afioga? Se ua malo le fai o le faiva. O le a uma lava lenei Paeaiga e le i tulia se isi i fafo. E mafua i se a? Leaga o le tofa e alofa, o le tofa e faapalepale, ma le tofa e tausi ai le filemu o le Palemene. Lau Afioga, o la matou tatalo, ia faamanuia le Atua i lau Afioga, ia maua pea le tofa mai le Atua aua le taitaiga o le Maota Fono nei. O se tala lea ma le faaaloalo e faafetai atu ai i lau Afioga i le Palemia, aemaise lau Afioga i le Fofoga Fetalai ma lenei Maota e tusa ai ma faaiuga fiafia aua lava le faafitauli e pei ona feagai ai. O se tala lea ma le faaaloalo.....

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu ma Afioga ma Agafesootai): O se mea e fia faasao lau Afioga i le Fofoga Fetalai.

FOFOGA FETALAI: Se i maea le saunoaga a le Taitai o le Itu Agai ona tuu atu lea o le avanoa lau Afioga i le Minisita. (*I le Minisita mo Tina ma Tamaitai, Atinae o Nuu ma Afioga ma Agafesootai*).

Afioga Hon PALUSALUE FAAPO II: O se tala lea ma le faaaloalo, afai foi ua paopapa se faamatalaga ma le tau tamalii i se faafofoga a lenei Maota aemaise Samoa, ia malu ave i fale, tatou fale i le fale o le Atua, lea ua magalo ai mea uma. O se tala lea ma le faaaloalo, ia manuia le Fono.

FOFOGA FETALAI: Malo. Faafetai saunoa i lau Afioga i le Taitai o le Itu Agai. Ae leaga o lea na tulai mai le Afioga i le Minisita mo Tina ma Tamaitai, Atinae o Nuu ma Afioga ma Agafesootai. Se i tulai mai po o se isi faaopoopoga o le faafetai.

Tofa Hon Tolofuaivalelei Falemoe Leiataua: Lau Afioga i le Fofoga Fetalai e tulai atu ma le faaaloalo e le faaluaina le saunoaga a le Palemia, o lea foi ua pale laei le saunoaga a le Afioga i le Taitai o le Itu Agai. Na pau lava le mea ou te manatua le upu a le isi foi Toeaina sa Taitai o le Itu Agai i na taimi, “O le mea o le ai nini e lalaoa ai le ulu.” Ia o le a te’i lava oso mai fua tau fua au faaiuga? A o le mea lava ia, o le tai ma lona taaga, o le fuata foi ma lona lou.

Na pau lava le mea ou te fia faasao, o lea na saunoa i le saunoaga a Iesu i luga o le satauro, ia fealofani. O lea e iloa ai, o le Aoa Fesoasoani taetaeupu ae le malamalama lelei i le taimi na saunoa ai le Alii. O le taimi foi lea ua itiiti lava nai ao o totoe o le lagi, ae toe faapea lava aao o le Alii ma valaau mai i ona soo lea e tutu atu i lalo, “Ia outou fealofani.” O le taimi lena ae le o luga o se satauro. Ma le faaaloalo.

Afioga Hon Palusalue Faapo II: Lau Afioga i le Fofoga Fetalai, o se mea e fia faasao lau Afioga...

FOFOGA FETALAI: E le o ni ai e avea lau Afioga i le Aoa Fesoasoani Matua. O lea o le a tuu le tatou Fono, ae ese le mataupu o le a talanoaina, a o oulua o Aoa Fesoasoani aemaise o le Tiakono Toeaina.

Afioga Hon Palusalua Faapo II: Lau Afioga i le Fofoga Fetalai, leaga e matua lou Aoa Fesoasoani i le Aoa Fesoasoani o le Minisita. O lea e i ai nei i lona Tiakono Toeaina.

FOFOGA FETALAI: Malo faafetai, faamalo atu le saunoa. E manatu o lea ua tulili le tai aua le faatamasoaliiga o tuleiga ma saunoaga o lenei taeao ma le aso. E ui ina ua soua muliava ma tatou lutia i Puava, ae o lenei ua tatou mapu i Fagalele, ma ua tatou taunuu i faamoemoega o tolotolo manuia ma lelei. Tatou sunui laia o ala o taua ma ave le faamua i le Atua aua o Ia ua tatou maua ai ao ma iu o Malo. O lana faatufugaga ua liutua ai afa i lenei taeao e avea ma malu ae taoto pea ia te Ia le peauvasa. O le musumusuga a le Agaga Paia i lenei taeao, ia tatou maua le agaga o le loto fefaamagalo ai. E ese le taimi o le tagata, ese le taimi o le Alii, ma e tutusa lava le aso e tasi ma tausaga e afe i ona luma.

Faafetai atu i lau Afioga i le Palemia, faamalo le tofa, faamalo le faauta, faamalo le faatoatoa, faafetai i lou agaga faa-tama ma lou loto faamagalo. A sala uta, ia tonu pea tai. E manatu le Fofoga Fetalai e le faigofie le faatautaiga o le sa folau o Samoa aemaise lau taitaiga ina nei satia le sa o le atunuu, ma e iloa le tautai matapalapala i aso louloua ma le faaletonu. Faafetai i le Atua i lou finagalo.

Faafetai atu foi i lau Afioga i le Taitai o le Itu Agai. A lualuta loa le gataifale ona tatou piiama faatasi lea ma le auvaa ma tatou apefoe faatasi ma alo malosi mo se manuia lautele o si o tatou atunuu ina ne i sae le sa o Samoa, aua ou te manatu e le malaese i ina malaese iinei.

Faafetai i lau Afioga i le sui usufono, lau Afioga Toeolesulusulu Cedric Pose Salesa Schuster aemaise le afioaga o Satapuala. O le afio lava lea o Toalepaialii o le Saoalii ma afio mai Satuala, alaalatai Vaili o le Laau na Fausia, o le Tootoo o Maauga, alaalatai le nofo a fuaiala i le Vainalepa ma le Lauti na Laulelei ma upu ia te oe le Faleaana. Ou te manatu e le tau fofola so tatou fala pe tau sii se matalalaga aua e lasi ma lasi ma lasi o tatou faia, tatou te fetaii i ulu o gafa ma iu o gafa ma matavai ma mulivaifetaiai. E lafalafa tuna a o gafa lava o le Tuiaana Tamaalelagi ma le paia i le Aiga Satuala ua oo ma tini tauao. A silasila le Palemia, tulouna tulauniu o Atua o ao ma iu o Atua, o le Afioga i le Aiono o le Laau na Fausia e Aana, o le gafa tau Tupu aua le Tuiaana Tamaalelagi ma le paia o le Aiga Satuala.

A liliu i le Afioga i le Faamasino Sili na afiina lenei mataupu, o sulii tau manava foi aua le paia o le Aiga Tauaana ma le latou Tama. A liliu mai ia te au o le Fofoga Fetalai, o paia o le Falefitu o Leatitagaloa ma le mamalu ia Falelatai e tausia le Tuiaana, o lea foi ou te tausia. Le mamalu ma le paia o le Kapeneta aua le usoga o lo o alaalatai le Matua o le Itumalo le Fetalai ia Leulumoega, o paia popo ma pa le solo aua le itumalo, o manatu na ma lagona na, ia fua se tapu, aua o mea e tutupu nei, e limataitaiina ai taeao.

O le matou tatalo, ina ia aua aua lava ne i toe tulai mai ni faafitauli faapenei i le atunuu. Ia aoga e limataitaiina ai Samoa ma le lumanai ina ia tatou o i faiga faavae o le tatou fetausiai o le va nonofo ma le va tapuia e filemu ai Samoa mo lona lumanai.

O lau fautuaga, le sui usufono mo Aana Alofi Nu.1, a e manao i upu o le ola, ona e fesili lea i se tasi o sui usufono mo Salega, Tofa Tapuai Toese Ah Sam lena e i ou tafatafa, a e manao i lau tofa ia fesili i le sui usufono mo Faasaleleaga Nu.3. Aua e te faalogo tele i le sui usufono mo Faleata Sisifo ma

le sui usufono mo Gagaemauga Nu.2, o le mea lena e tupu ai le faaletonu. A fia umi ona e tulai i le nofoa, ia fesili i le sui usufono mo Falealupo ma le Taitai o le Itu Agai.

Ona iu ai lea o sa matou faamatalaga i lenei aso, ia fai ni ai o le aso, o le a ou togisala. O lau sala o le a fai, o le a e saunia se taumafataga mo le Palemene i le Fonotaga ia Tesema, na ona lafo atu faapena ae faaaoga i ai lou mafaufau. O le upu a le tamaloa Safata, 'A e fia malamalama, fesili i le Taitai o le Itu Agai.' Be careful, be very careful. Aua ne i toe tulai mai ni mataupu faapenei. Ae ona o oe o le sui usufono e matua mautinoa ma molimauina e le Fofoga Fetalai, o oe le isi sui usufono numera tasi i ou manatu ma lagona. Talosia ia taofi mau le faatuatua ma le agaga o le tatou Itumalo, ia aumai pea oe e oo i le faavavau.

Ia o le faasilasilaga lena a le Fono Aoaofa Fautulafono e ala atu i le Fofoga Fetalai e faaiu ai lenei mataupu i lenei aso.

TUUNA ATU O PEPA

Na tolaulauina e le Failautusi Pepa ua tuuina atu e tusa ai ma le T.T.48:

1. S.R.2013/7, Tulafono o le Ofisa o le Loia Sili 2013 – Faasilasilaga o le Amata Faamamaluina.
2. P.P.2013/2014 Nu.39, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga 2011-2012.
3. P.P.2013/2014 Nu.40, Lipoti Faaletausaga a le Pulega o Tagata Tafafao Maimoa mo le Tausaga Iulai 2011 – Iuni 2012.
4. P.P.2013/2014 Nu.41, Tali atu a le Malo i le P.P.2013/2014 Nu.31, Lipoti a le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa i le P.P.2011/2012 Nu.97, Lipoti Faaletausaga a le Faletupe o Atinae a Samoa mo le Tausaga Faaletupe Faaiuina aso 30 Iuni 2011.
5. P.P.2013/2014 Nu.42, Lipoti Faaletausaga a le Auaunaga Faa-Soifua Maloloina 2009-2010.

TUUNA ATU O LIPOTI A KOMITI FILIFILIA

Na tolaulauina e le Failautusi le Lipoti a le Komiti Filifilia ua tuuina atu e tusa ai ma T.T.51(5).

1. P.P.2013/2014 Nu.43, Lipoti a le Komiti o Tupe Maua ma Tupe Totogi i le P.P.2012/2013 Nu.18, Lipoti Faaletausaga a le Faalapotopotoga mo Taui o Faalavelave Faafuasei mo le Tausaga Faaletupe 2011.

TULAFONO TAU FAAOFI O TEUTEUGA O LE TULAFONO O TAAVALE FEOAI I ALA TETELE 2013 – faitauga faatolu

FOFOGA FETALAI: Mo le silafia e lenei Palemene, o le Tulafono Tau Faaofi lenei sa faia lona iloiloga auiliili i le aso 7/8/2013.

Tulai mai lau Afioga i le Minisita mo Galuega, Felauaiga ma Atinae Eseeese.

Afioga Hon MANUALESAGALALA ENOKATI POSALA (Minisita mo Galuega, Felauaiga ma Atinae Eseeese): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Taavale Feoai i Ala Tetele 2013 i lona faitauga faatolu.*

Faaluaina e le Sui Palemia, Minisita mo Fesootaiga ma Faamatalaga Tekonolosi, Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo le Soifua Maloloina.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.

TULAFONO TAU FAAOFI O LE SUEINA O TUSI 2013 - faitauga faatolu

FOFOGA FETALAI: Mo le silafia e le Palemene o le Tulafono Tau Faaofi lenei sa faia lona Iloiloga Auiliili i le 7 Aokuso 2013.

Tulai mai lau Afioga i le Minisita mo Pisinisi, Alamanuia ma Leipa ma le Ofisa Suetusi lau Afioga i le Sui Palemia.

Tofa Hon FONOTOE NUAFESILI PIERRE LAUOFO (Sui Palemia, Minisita mo Pisinisi, Alamanuia ma Leipa ma le Ofisa Suetusi): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Sueina o Tusi 2013 i lona faitauga faatolu.*

Faaluaina e le Minisita mo Tupe Maua, Minisita mo Fesootaiga ma Faamatalaga Tekonolosi, ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.

TULAFONO TAU FAAOFI O FAIGA ALOAIA E TOTOGI AI TUPE A LE ATUNUU 2013 – faitauga faalua

FOFOGA FETALAI: Mo le silafia e le Palemene o le Tulafono Tau Faaofi lenei sa faia lona faitauga muamua i le aso 6 Aokuso 2013.

I le toesea ai o le Afioga i le Minisita o Tupe, ou te tapa lau Afioga i le Palemia e tulai mai.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, i le toesea ai o le Minisita o Tupe, ou te tulai atu ma le agaga faaloalo e faatu le lafo, *Ina ia faitauina nei le Tulafono Tau Faaofi o Faiga Aloaia e Totogi ai Tupe a le Atunuu 2013 i lona faitauga faalua ma ou te fia tautala faamalamalama i ai.*

Faaluaina e le Sui Palemia, ma le Minisita mo Faamasinoga ma Pulega Tau Faamasinoga.

FOFOGA FETALAI: Tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai o le Tulafono Tau Faaofi lenai, lea ua faataoto mai ai se faiga aloaia e totogi ai tupe a le atunuu, e mafai ona avanoa i ai lelei atoatoa ma mautu e tausisia ai faiga faataataatitia faava o Malo, o nei faiga o le a faafaigofie ai se siosiomaga tau tupe faafoeina lelei mautu i totonu o Samoa. Ma o le vaega latou te faagaoioia le Tulafono lenai, o le faletupe tutotonu pei lava ona silafia sei tau mai i le tausaga e 1983, sa leai se tatou faletupe tutotonu, sa faatino uma e le Matagaluega o Tupe galuega faa-Faletupe Tutotonu e lilifa i le faasoasoina o a tatou vaegatupe faaagaaga mo le okaina mai o oloa i fafo ato ai ma totogiina atu o tupe i fafo ia faapea foi ma le puleaina o gaioioiga o faletupe uma lava i totonu o Samoa ina ia aua ne'i alu alu faaletonu mai se faletupe.

O le sini autu o le Tulafono Tau Faaofi, o le faamautinoa ua faamautuina lelei poloaiga tau le faaliliuina o tupe ma o le a le toe mafai ona faaleaogaina mulimuli ane pe toe faafoi pe faataatiaese ia faiga. O le tuuina atu o fuafuaga o maliega mo le faatulagaina o tupe mama mo vaega auai, faapea foi le faamautinoa e faapea a faia se poloaiga o le lē mafai ai ona totogi aitalafu e faasaga i se kamupani e tuuina atu se auaunaga e ao ona taofia lē tumau le auaunaga e puipuia ai aseta faamauina mo ni nonogatupe, ia ma le sini mulimuli, le amanaia ai o tupe faaliliu atu faa-electronics ma faamaumauga taua a faletupe e pei o le tauaaoina o ata aloaia o siaki tupe faa-electronics tulaga faamalosi tupe faaliliuina ia ma isi tulaga faapena. O le a aiaia i le faiga aloaia e totogi ai tupe a le atunuu i itu nei, itu nei taua lava, pepa faamaonia faatulafono mo le faatinoina o tupe totogi, ina ia amataina ai ma faatonutonu ai le faaliliuina o tupe ia i le va o teugatupe a tagata e totogiina atu tupe ma i latou e totogi i ai tupe i faalapotopotoga tau tupe. O le faatulagaga eseese o le totogiina o tupe, ia faagaoioia ai feuaiga faapisinisi ma faagasolo loa ia maea pepa faamaonia faale-Tulafono mo le faatinoina o tupe totogi, ia faapea foi le faagasolo ma faailoa atu loa faamatalaga o tupe totogi, ma faaliliu atu tupe i le va o faalapotopotoga e taliaina ia tupe.

Ia ma le faiga aloaia lona tolu o faalapotopotoga tau tupe ia tuuina atu teugatupe i tupe totogi pepa faamaonia faale-Tulafono e totogi ai tupe ma auaunaga i tagata e faaaogaina ia auaunaga faapenei, ia ma kamupani e tuuina atu auaunaga ia o lo o faagaoioia feuaiga eseese faapisinisi e aafia ai mea tau tupe totogi, faamaea lelei ona totogi ma mauaina mai ai nisi pepa faamaonia faale-Tulafono mo le faatinoina o tupe totogi ma auaunaga. Ia ma le faatulagana ma le tuuina atu, faia o tau faaooina atu ma le maua mai o nisi o pepa faamaonia faale-Tulafono mo le faatinoina o tupe totogi ma auaunaga, ia ma le faatonutonu tatau faaleTulafono o auala eseese e faatino ai le faagasologa o le faaliliuina o tupe totogi ma le faafoeina o auaunaga tau tupe totogi.

Lau Afioga i le Fofoga Fetalai, o vaega tetele lava na e faasino i le Tulafono lenai, a maitauina, o le matua tele o mau parakalafa ia ma o uiga lava ia o mea o Tulafono faapenei e fai sina lavelave ae o lo o i ai le faanaunautaiga, a maea ona faasee atu lea i o i le Komiti o Tulafono e mafai ai ona maua le

avanoa e le toatele o o tatou tagata e ooina atu i ai e faaalua ai o latou finagalo i le Tulafono lenei, lau Afioga i le Fofoga Fetalai, ia o le ootoga lena o le Tulafono Tau Faaofi lenei.

FOFOGA FETALAI: Malo. Faafetai saunoa faamalamalama i lau Afioga i le Palemia. Ia o a tatou faiga masani, pe i ai se sui usufono e fia saunoa, a leai o le a tuuina atu loa le tatou fesili.

Na faamaonia le lafo ma faitauina le Tulafono Tau Faaofi o Faiga Aloaia e Totogi ai Tupe a le Atunuu 2013 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o Tupe Maua ma Tupe Totogi mo le iloiloia ma toe lipoti mai i le Fono Aoao i se Fonotaga o lumanai.

TULAFONO TAU FAAOFI O APERENITISI 2013 – faitauga faalua

FOFOGA FETALAI: Mo le silafia e le Palemene o le Tulafono Tau Faaofi lenei sa faia lona faitauga muamua i le aso 6 Aokuso 2013.

Tulai mai lau Afioga i le Minisita mo Pisinisi, Alamanuia ma Leipa.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Aperenitisi 2013 i lona faitauga faalua ma ou te fia tautala faamalamalama i ai.*

Faaluaia e le Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu ma Afioaga ma Agafesootai.

FOFOGA FETALAI: Se i tulai mai lau Afioga i le Minisita e saunoa faamalamalama.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai o le Tulafono Tau Faaofi lenei e toe faatulaga ai se faatulagaga fou mo Aperenitisi i totonu o Samoa. Ma o lenei la Tulafono Tau Faaofi, o le a soloia ai le Tulafono o le Faiga e Faafaigaluega ma Aoaina ai Tagata Galuega 1972 ia po o le Tulafono o Aperenitisi tuai po o lo o i ai nei.

O Tulafono Tau Faaofi lenei e toe faatulaga ai faiga faaneionapo mo Aperenitisi, o lo o avea ma vaega faa-Matata eseese ma aoaoga faamasani i totonu o Samoa. E manatua foi o galuega faa-Aperenitisi ia o mataupu lava ia faa-Matata eseese e i ai le faimoli, o le palama, o le kamuta, o le uelo ia ma isi matata eseese faapena. Ia ma o lenei la Tulafono o lo o i ai foi se vaega ina ia faapitoa mo tupulaga talavou mo le aotauina o latou i totonu o aufaigaluega ma faapena ona tapenaina ai latou e avea ma tagata faigaluega agavaa, ia po o qualify trades men po o trades woman. O le Tulafono foi lenei e taumafai ai ina ia fofo ni faafitauli e tulai mai i le utiuti o tomai ma agavaa ma ia foi ituaiga tomai po o ia ituaiga agavaa i totonu o le atunuu pe a faapea e tulai mai. Ia ma o fuafuaga nei o lo o faapena ona ogatasi ma fuafuaga po o

faamoemoega o fuafuaga faataatitia mo le atinae o Samoa 2012 i le 2016, ia po o le tatou STS. Ua tuufaatasia foi galuega ma suesuega faavaitaimi i lenei polokalame faa-Aperenitisi, aua ia po o le tulaga lea o le part time, e fesoasoani ai foi mo latou e le o maua le avanoa mo le taimi atoa e tuuina atu i nei aoaoga, ma ua maua foi se avanoa mo latou e mafai ona ave ai faavaitaimi pe ave faa-part time ia nei aoaoga faapenei. Ia a o tulaga masani e le gata i tomai faa-agavaa faatino ia po o le practical o le side o le faatinoga o aoaoga ia faapea foi le faamalamalamaga o mataupu aoaoina ia po o le theory i tulaga o mataupu faapenei.

O tagata e ona galuega ia po o kamupani foi ma fale faigaluega i totonu lava o Samoa ia tuuina atu avanoa mo latou e faapena ona aoaoina ai le tulaga o le faatinoga o le galuega po o le practical, ia e faapea foi la ia Aperenitisi ia e faaaogaina lelei ma faaaogaina tatau ia avanoa e faapena ona tuuina atu i kamupani aua le aotauina ma siitia ai lo latou tomai ma lo latou agavaa i mataupu matata eseese.

Ia o nei faiga uma lau Afioga i le Fofoga Fetalai, o le a aiaia uma ma vaavaaia e le Komiti Faafoe po o le Council foi lea faatasi ai ma le lagolagosua a le Matagaluega o Pisinisi, Alamanuia ma Leipa.

I le taimi nei lau Afioga i le Fofoga Fetalai, e 140 i latou o lo o i ai i le polokalame lea, ia ma o tausaga uma e faia ai a latou faauuga, o le faauuga talu ai na faatino lea i le masina o Fepuari 2013, o le tausaga nei e 52 latou na faauuina e aofia ai ma le tamaitai e toatasi na faauuina i le matata o le palama. O le isi faauuga i tua atu, ia pe maua foi e lata foi i le 50 i latou na faauuina e aofia ai ma se tamaitai i le matata lea o le faimoli po o le electrician, ma o le tulaga lea lau Afioga i le Fofoga Fetalai, ua faapena foi ona lagona se lagona fiafia ona o se faagaetia ona o tamaitai ua faapena foi latou ona taumafai ma finau e aotauina i matata eseese nei ona e pei o aso la, sa masani lava ona mafuli i alii talavou. O i latou ia pei sa tele ina o i tulaga nei ma sa matele ona aotauina i matata eseese nei, a o nei onapo, o lea ua maitauina ua faauuina ai foi ma tamaitai i ituaiga galuega faapenei.

E pei o le tulaga lea lau Afioga i le Fofoga Fetalai e faamalamalamaina ai le Tulafono Tau Faaofi fou lenei ma le agaga faaaloalo.

FOFOGA FETALAI: Malo faafetai i le saunoaga faamalamalama a lau Afioga i le Sui Palemia po o le Minisita foi o le Matagaluega. O lea e i ai le sui usufono e fia saunoa.

Tulai mai le sui usufono mamalu mo Gagaemauga Nu.2.

Tofa LEVAOPOLO TALATONU (Gagaemauga Nu.2): Faafetai i lau Afioga i le Fofoga Fetalai mo le avanoa. E momoli atu foi le agaga faafetai i le Afioga i le Sui Palemia mo lenei Tulafono Tau Faaofi. O le upu moni lava lau Afioga i le Fofoga Fetalai, ua fai si leva o lenei polokalame, o le polokalame foi lenei o se polokalame e taua tele ona e le o natia foi lava le tulaga o le fia maua pea e le tatou atunuu o nei tomai ma agavaa i tulaga faa-inisia e mafua ai ona tulai mai ma taumafai le tatou Malo e faaleleia le polokalame lenei. O le upu moni lava lau Afioga i le Fofoga Fetalai, ua leva ona ou maitauina le polokalame lenei, ma o lea foi la ua toe sui le Tulafono Tau Faaofi, a o le upu moni lava, e le o sololelei le faatinoga o le polokalame.

O le mafuaaga lau Afioga i le Fofoga Fetalai, e faafesili atu ai i le Afioga i le Sui Palemia, i se tulaga ma se faiga faavae lelei e faatino ai, ona o lea e pei

e foliga e lafo le faatinoga o le polokalame lea i tua i kamupani foi nei i tua aemaise lava le private sector, e tele ai kamupani foi nei fai eletise, inisinia taavale ma nisi faa-kamuta ma tulaga faapena. A o le tulaga sa ou maitauina, e le o lava resources e faatino ai e kamupani ia le faaauauina o le aoaoina o tatou tagata ia po o alo foi ma fanau i lalo o le polokalame lea o le faa-aperenitisi.

A silasila lau Afioga i le Fofoga Fetalai i le Tulafono Tau Faaofi lenei, e tele lava ni noataga o i ai i lea foi vaega i le private sector e pei o le vaega fai moli. O le latou galuega ia taasisia lelei faamaumauga o le aoaoina ma le faafaigaluegaina o alo ma fanau ia po o tagata foi faigaluega. O le isi vaega latou te vaaia lelei le saogalemu o tagata ia o le a avatu e faafaigaluega. O lea foi e manino mai i lalo o le Tulafono Tau Faaofi, ia lelei le totogiina o tagata nei. Ua maitauina lau Afioga i le Fofoga Fetalai, o nai pisinisi laiti ia e tele i ai le faamoemoega o le polokalame lenei, e le o lava foi a latou alagatupe e faatino ai le polokalame.

E pei o le itu lea e avatu ai se talosaga pe faafesili atu foi i lau Afioga i le Sui Palemia, pe i ai se fua a le tatou Matagaluega e faasafua atu ai ni nai seleni i vaega ia e faatino lelei ai ma atoatoa le faatinoga o le polokalame. E pei o le lape lena o lea e i ai nei, ma o le tulaga foi lena o lo o atugalua ai tatou kamupani ia e faatinoina le polokalame lenei.

Ae pei o lau fautuaga, tuu atu ni nai seleni e faatinoina ai e kamupani ia resources, aua a faapea e alu atu le tagata aperiitisi e kamuta, e agai le kamupani lea e faatau mai ni laupapa ma mea uma faapena e fai ai le latou aoaoga mo le latou experience. E pei o se manatu puupuu lea lau Afioga i le Fofoga Fetalai. Ma le faaaloalo lava.

FOFOGA FETALAI: Malo. E manatu na o le pau lea o le sui usufono. Oi, ia malie lau Afioga i le Sui Palemia se i faamaea lava le fesili lea mai se tasi o sui usufono mo Salega.

Tulai mai se tasi o sui usufono mo Salega, Afioga Afualo Wood Uti Salele.

Afioga AFUALO WOOD UTI SALELE (Salega): Faafetai i lau Afioga i le Fofoga Fetalai. E momoli atu le faafetai i lau Afioga i le Sui Palemia mo le Tulafono Tau Faaofi. E moni lava au o le Tulafono Tau Faaofi ua loaloa, a o lea lava e aumai ina ia mautinoa ua faamalieina uma manaoga aemaise lava le tulaga lea i le aoaoina lelei o alo ma fanau aemaise foi le paia o le atunuu o lo o tautua e ala i matata eseese. Ae agai sau tautalaga i le avanoa tutusa o tamaitai ma alii e foliga mai ua loa le polokalame a o lea na o le taitasi le tamaitai lea ua faauu. E avatu ai se fautuaga i lau Afioga, ina ia toe silasila totoa i ai, ae a pe a tuu i ai se pasene ina ia faapena ona faatosina mai, ia tatou amatamea i tamaitai i le fono nei, e tatau foi ona toatele ni tamaitai i auunaga nei. Aua atonu foi e fua i le malosi, ae out e talitonu e le o toe faapena lenei vaitau. O le tele lava o atunuu i fafo, ua tulimatai lava ma tulituliaupu galuega, aemaise lava o le faatinoga o le auunaga ina ia mautinoa ua tutusa le aia lea moa lii ma tamaitai e tautua ai i so o se vaega lava mo le faatinoina, aemasie lava galuega nei e le faigofie, o le faatinoina lea o galuega e ala i matata eseese. Faafetai i lau Afioga i le Fofoga Fetalai mo le avanoa.

FOFOGA FETALAI: Malo. Malie lava lau Afioga i le Sui Palemia o lea e i ai nai sui usufono nei e tulai mai. Tulai mai le sui usufono mo Faleata Sisifo ona tuuina atu lea o le tali a le Sui Palemia.

Tofa LEALAILEPULE RIMONI AIAFI (Faleata Sisifo): Faafetai lava i lau Afioga i le Fofoga Fetalai mo le avanoa. Ua maua foi se avanoa e saunoa ai i lenei mataupu. I le Tulafono Tau Faaofi. E momoli atu le faafetai i le Afioga i le Minisita ma le Matagaluega. Ae i ai nai vaega ia, ona o lenei vaega tau mataupu tau trades i le faa-aperenetisi, o se vaega taua tele i so o se atunuu, aemaise foi si o tatou atunuu. E pei o mataupu nei e focus e faasino tonu i mea tau galuega. E pei e more job oriented. E le tau suea la sau galuega pe a uma, e tele lava ina uma, e pei o lo o i ai le tomai foi lea a leai se galuega, a o la e faaaoaga i tua i aiga ma nuu. E pei o vaega ia e tataua ona ave i ai le faamamafa. Ia manatua le matou asiasiga ma le Fofoga Fetalai numera tasi lea sa i ai talu ai, sa matou o ai i Melepone i nisi o aoga. O le mea la ua i ai aoga i Ausetalia, a oo loa i le Year 10, amata loa ona grant off tamaiti i mea nei o vocational training, ua amata loa ona fai le faaiuga a le tamaititi, e le alu fua i nisi mea, o lea ua i ai aoga foi nei e no focus i mea tau academic sign, a ua loto le tamaititi e agai loa i aoga faapea particular i mea e fiafia i ai, amata loa ona o e aoga ai. O le vaega taua lea.

O le isi vaega, o lea ua tatou molimauina foi le taumafaiga lea ua fai e kamupani vaa ma isi vaega i le faaigaaluega e latou ma faaaoaga e latou tamaiti ina ia talafeagai ma vaega o le latou galuega. Ia, na ona uma lava ona ave o lana certificate, toe avatu i ai ma lana pepa faigaaluega. O se faiga matua matautia tele le matagofie, e pei lava o le mea lea sa i ai nai teine foma'i i aso ia e te nofo lava i gauta i le falemai ma e aoga ma faigaaluega atu ai lava pe a uma. Tusa e on the trial training foi lea le tauga o le mea lena. Ae o lea la ua aumai le Tulafono Tau Faaofi i le toe suiga o i ai, e manaia tele. O ita ia, e alu lava lota manatu i le taimi foi na aumai ai le Tulafono Tau Faaofi lea o le tuufaatasiga o le Polytechnic ma le NUS, ae sa i ai lava lou manatu foi lele ta te fiafia lava i le mea sa i ai, tuu ai pea nai tagata nei e more focus ia i latou aoga, ae taua tele le latou pitolaau.

Na pau le mea i le Tulafono Tau Faaofi, e le o faamamafa foi i le vaega lea o le saogalemu, le health and safety o tagata faigaaluega. A tatou taamilomilo nei i le taulaga, e i ai fale tetele ia e fai i le taimi nei, ta te vaai atu lava o la e atoapa mai e leai ni safety foi nei, a o tagata fai auala, e feofeoai lava i lalo ma seevae tosotoso le toatele e leai ni pulou, leai ni mea foi lele, e oo i le au ao lapisi, se i vaeane, e vaai atu lava o la e tae mai i lima, o le aufai moli. E pei o vaega ia e tataua ona ave i ai le faamuamua le faamamafa i le taimi lenei, aemaise i lalo o le taotoga po o se isi Tulafono o aafia ai, sa tataua ona i ai foi i le tatou Tulafono Tau Faaofi lea.

O le isi vaega lau Afioga i le Minisita, o lea e tamau mai le taimi ma le tausaga, 18 tausaga faatoa mafai ona ave a oe ma aperiitisi. Aisea le mea e tamau ai i le 18? Aua o le tele o tamaiti e uma ifo le latou tausaga 12 lea e i ai nei, faatoa tai 16 tausaga, 17. Ae manaia aua o le taimi foi lea e faamuta ai le compulsory education lea, o loa e aoga i mea nei, faigaaluega ma aoga, ae aua le tamauina i le tausaga o loo tulai mai ii e 18 tausaga.

O le isi vaega se i tagai i ai lau Afioga ma le Matagaluega, masalo e le o sao, ai o se mistype po o se – e tele le faaletonu i le Fuaiupu 17, lena e sese le vaega lena e tuu mai i le vaega 7 e sese le tulaga o le overrule e le Minisita le

talosaga foi lea e avatu, ia, e toe tagai ifo i ai o lena e sese le tulaga i le subsection lena e sau i ina, o lena e sau i le 6 ae tatau ona tuu i le 9.

E le gata la i lea, faafetai o lea ua faamalasia mai aua o mea ia sa tele ina faitio ai tamaiti i aso ia, i le taimi foi lea o ou faigaluega au ia, le taimi foi lea e manaomia le tatau ona alu i le vasega, ae taofiofi e le employer i le taimi e pisi ai. A o lea ua faamanino mai e le Tulafono Tau Faaofi le konekarate lea e sainia, leaga e tatau ona faamuamua pea e le employer le taimi aoga e tatau ai ona o tamaiti nei i le aoga. E le gata i lea, o le taimi la lea ua maua lana certificate, po o le a le tuutuuga o le totogi, pe i ai se faamanuiaga faaopopo, pe i ai se minimum wage pe a maua le faailoga lea o le certificate o le apprenticeship. E tatau ona i ai se faailoga e attach i le pepa lea e faamalasia ai foi nai o tatou tagata i tulaga tau aoaoga i ia vaega. Ae momoli atu le faafetai tele mo le tatou Tulafono Tau Faaofi. Ma lou faaaloalo lava. Faafetai.

FOFOGA FETALAI: Malo faafetai. Malie lava lau Afioga i le Sui Palemia e taua tele le Tulafono Tau Faaofi.

Se i tulai mai le sui usufono mo Faasaleleaga Nu.4 ona tuuina atu ai lea o le avanoa i le sui usufono mo Falelatai ma Samatau.

Afioga PESETA VAIFOU TEVAGA (Faasaleleaga Nu.4): Faafetai i lau Afioga i le Fofoga Fetalai, ua maitauina foi le matagofie o lenei Tulafono Tau Faaofi. E momoli atu foi le faafetai i lau Afioga i le Sui Palemia ona o le Tulafono Tau Faaofi ua faataatia. Tasi lenei Tulafono Tau Faaofi o le tele ia o lona faatauaina ma lona lelei mo le lumanai o tagata, e le gata foi i alo ma fanau a Samoa, a o tagata faigaluega ma konekarate uma o lo o galulue i totonu o le tatou atunuu.

I le maitau atu la i lenei Tulafono tau Faaofi, o lo o i ai lava nisi vaega e ese le taua e ao ona toe faaopoopoina i ai. O lea ua manino i lalo o le Tulafono Tau Faaofi trades_eseese ma matata eseese, ae a silasila foi lau Afioga i le Fofoga Fetalai, o lea ua tele ina fausia fale maualuluga i totonu o si o tatou atunuu. E pei foi ona taua e se tasi o sui usufono mamalu mo Faleata, i le tulaga lava lea e le o faamalasia i totonu o le atunuu. I le maitau atu i le tele o galuega ua mavae, e tele lava ina tulai mai ai faalavelave, ma o le tele foi o nisi ua maliliu, ona tatou tuuaia lea i le faatamala, ae ou te talitonu a mafai ona faamalasia i totonu o le Apprentice School po o le Aoga Aperenitisi le tulaga lea i le safety, ou te talitonu o le a tele lava ina puipuia mai tagata faigaluega mai mea ia o faalavelave.

Silasila foi lau Afioga i le Fofoga Fetalai, e tatau ona i ai le tulaga foi lea e aoaoina ai le savavali o alo ma fanau i le mea o lo o i ai le aoga lea i Vaivase ina ia faapea ona aoaoina ai le iloa e le tamaitiiti ona savali i mea maualuluga. Ia aoaoina ai ia iloa e le tagata faigaluega po o le tamaitiiti aoga, e i ai ni safety line po o seevae faigaluega.

O le tele foi o tulaga ia e tutupu mai i le Faalapotopotoga o le EPC, e i ai seevae lea ou te vaai latou te faaaogaina – wrong boots ma e sese seevae faigaluega. E ala ona ou fai atu le tulaga lea aua o galuega tetele i atunuu la, e faapitoa lava seevae e faaaoga i lea matata ma lea matata. A o le tele lava o galuega i lau matau i galuega nei, e faaaoga seevae nei e faaaoga i fale inisia. A o galuega a i latou nei e feaei i fale nei po o pou moli, e le faaaogaina ai ituaiga seevae na. E i ai seevae faapitoa lava e faaaogaina ina ia mafai ai ona aua ne i e see. A o lau matau i le tele o galuega tetele, e le o

malu puipuia. O le tele foi o fale nei e fausiaina, e leai ni safety line foi ia e mafai ona faapipii muamua e le konekarate e pipii ai tagata faigaluega ma fai galuega.

O le tulaga foi lea e avatu ai se manatu o lou nei sui usufono lau Afioga i le Fofoga Fetalai ona e tatau lava ona faamalasia le tulaga lea i le safety. E tele foi tupe a lo tatou Malo ua faaalu, a le o le pau mai o le tagata i luga o le fale, po o faalavelave lava e tutupu mai i totonu o galuega.

Ou te manatua e i ai se tasi o galuega a o fai le fale lea i le Apia Park lea na malii ai se tasi o tagata faigaluega ona ua motu ifo le uta, tulou lava, ae ua i luga tonu lava le uta lea i luga ae o le tagata faigaluega. Sa tele foi ina tuuaia le masini sa siiina lenei uta, a o lau matau i tulaga e tutupu i mea faapenei, e mafua mai ona o le le lava o le aoaoina o i latou o lo o galulue i le faaaogaina o mea nei e faapipiina ai uta nei.

E faapea foi i masini tetele nei ua auina mai i totonu o lo tatou atunuu. O le tele o premo grader nei ua aumai i totonu o le atunuu.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai.....

FOFOGA FETALAI: Malie lava le sui usufono o lo o saunoa, se i tuu atu le faamalamalama a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Na o le tasi lava se mea e fia faasao i le Afioga i le Minisita Lagolago mai ia te au.

O le alii lea na malii i le Apia Park, i le galueaiina o fale ia a o lumanai taaloga o le 2007 lea ou te tau tomanatu i ai, o le tagata o le kamupani Saina o le Shanghai Construction e Fomeni, ma o ia lena e taitaia le vaega uma lea. O lona uiga o lea ua atoa i ai le poto i tulaga tau le aoaoina i le safety i le puipuia o lona soifua. Aua o le alii lea na malii na ave i fafo i lo latou aiga, a o se tasi lea tagata maoae le atamai.

Ia manatua foi o le tasi lena mea lea na lavea ai lo tatou vaalele lea na pau, na ave e le ave vaalele aupito atamai, ma o ia lena na aoaoina isi ave vaalele. O le mea lena e tupu i le tagata pe a ova poto. E ova poto loa i le tulaga i mea tau safety, ona faatamala loa lea ona o lea ua i ai le manatu, “O au lava ua poto e vaai uma mea ia,” ona faapena loa lea ona tutupu ai faalavelave.

E pei la e laitiiti lava le mea lea ou te fia faasaoina ona e sao le saunoaga a le sui usufono i le mea lea o le malamalama lelei o i latou nei e aperenitisi i auala e tatau ona fai ma ia i ai foi ma le faautautaga tatau, aua e misi loa le faautautaga tatau, oti atoa uma loa ma le poto lena e i ai. Ona tutupu loa lea o faalavelave faapea ona ua amata ona faatamala, ae e taua tele le fautuaga ua aumai e le sui usufono, ae na o sina faaopoopoga e faaatoatoa ai le mataupu lea o lo o saunoa i ai.

FOFOGA FETALAI: Malie le sui usufono o lo o saunoa se i tuu atu le avanoa i le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon Tolofuaivalelei Falemoe Leiataua: Faafetai lava i le saunoaga a le sui usufono mamalu.

Pau lava le mea ua ou tulai atu ai na ona faamanatu atu i le sui usufono mamalu, o le Tulafono lea o Aperenetisi i lou iloa, e i ai sootaga ma le Tulafono Autu o le Matagaluega o Leipa e tau o le Labour and Employment Act. O le Tulafono lena o lo o i ai uma lava vaega e i ai le soifua maloloina ma le soifua o tagata faigaluega i le itu tau i le saogalemu lea e tau o le Occupational Safety and Health. E i ai uma lava la vaega na aua e lua lava vaega tetele o Leipa o le Wages and Conditions o totogi o galuega po o tuutuuga o galuega ma le vaega lea o le Occupational Safety and Health o la ua i totonu o le Tulafono lea o Leipa, ae i lalo uma lava la i le faamalu i le tulaga i tagata faigaluega ma pisinisi tumaoti.

Na ona ou fesoasoani atu i le afioga i le sui usufono mamalu ina ne i umi lona taimi e alu i lea vaega, a o la ua i ai puipuiga i lalo o le Tulafono Autu mo tagata faigaluega e o faatasi ai ma polokalame foi ia a le ILO po o le International Labour Organisation ina ia tagatasi ai Samoa ma atunuu e mamao i le tulaga i le puipuiga i galuega tetele ma le soifua saogalemu o tagata faigaluega.

Ma le agaga faaaloalo lava.

FOFOGA FETALAI: Faafetai fesoasoani mai. Malie le sui usufono mo Faasaleleaga Nu.4 ona e taua lou finagalo a o lea ua tulai mai le Afioga i le Minisita mo Aoga, Taaloga ma Aganuu se i fai mai sona sao ma sana fesoasoani mo le mataupu.

Afioga Hon Magele Mauiliu (Minisita mo Aoga, Taaloga ma Aganuu): Lau Afioga i le Fofoga Fetalai ona o lea e taamilomilo le saunoaga a le sui usufono i mea tau safety, ae ia manatua foi o tamaiti ia e o agai i le apprenticeship i le taimi nei e uma le tausaga muamua ma lona lua i le Iunivesite. A silasila le sui usufono i le curriculum la e faaoga e le Iunivesite, o le lesona muamua lava lea e fai e le tamaitiiti o le safety, seiloga lava ua uma le fa po o le lima vaiaso o le basic safety lea, ona faatoa o lea i le isi vaega. E i ai lava le taimi ma e pei lava o la lava e fai i le taimi lenei. E i ai le fesootaiga a le Iunivesite ma le Faleoloa o Faatoaga e faatau ai i le Iunivesite safety boots ma overall ma mea faapena, ae togitogi e le tamaitiiti.

E i ai foi le isi taimi na faatau ai e le Iunivesite mea faigaluega ona o le faataua lava o le vaega lea. E le faapea la e le o aoaina le safety, a o le faafitauli lea e tulai mai, e aoao le safety i le Iunivesite ae omai i tua i galuega, e le o faatauaina i tua i fale faigaluega. Aua e i ai le taimi e fai atu ai le tamaitiiti aoga, “O le mea lea na aoaina ai au i le safety i uta i le Iunivesite.” Ae fai mai le pule o le galuega, “Tuu a outou mea faa-Iunivesite na e le taulia i inei.”

O le mea lea e le o se mea na o le Iunivesite le mea lea o le safety, a oo mai loa i totonu o le fale faigaluega, o le matafaioi lena a i latou e ana galuega, faafetai.

FOFOGA FETALAI: E manatu le sui usufono mamalu ua matua malamalama le tulaga tau safety lea na e saunoa i ai. O lea ua saunoa manino le Minisita mo Tina ma Tamaitai, Atinae o Nuu ma Afioga ma Agafesootai e faamalamalama Tulafono o lo o tausia e isi Matagaluega a le Malo ona o lo o i ai faiga faavae e tagofia ai le tulaga tau le saogalemu.

O lea foi ua saunoa malamalama le Afioga i le Minisita mo Aoga, Taaloga ma Aganuu, e leai o la e fai aoaoga i mea tau safety. Malie le sui usufono o lea ua malamalama tulaga i mea tau safety, ae a i ai nisi vaega o lau lauga ona faauma mai lea ae se i faagasolo a tatou galuega, a o lea ua manino ou atugaluga i mea tau safety boots ma overall ma isi mea ia e te atugaluga i ai mo le saogalemu mo galuega.

Tulai mai le sui usufono e faaauau le saunoaga.

Afioga PESETA VAIFOU TEVAGA: Faamalo faafetai i lau Afioga i le Fofoga Fetalai. E pei o le agaga lena o le tuualalo ona o le tulaga lea e ao ona ave i ai le faamuamua a le Malo, o le safety po o le puipuia lea o le ola ma le soifua maloloina o tagata faigaluega, aemaise foi le iloa o tamaiti nei e aooga faa-aperenetisi ina ia malamalama i tulaga uma.

O lea foi ua saunoa le Afioga i le Minisita mo Aoga, Taaloga ma Aganuu i tulaga i meafaigaluega mo le puipuia o le saogalemu. E moni lava lau Afioga i le Minisita, ae mo le silafia foi, e eseese ituaiga meafaigaluega e faaaogaina i lea taimi i lea taimi i matata eseese.

Lau Afioga i le Fofoga Fetalai, toe tasi lava se mataupu e fia avatu ai se tuualalo ona o le tulaga lea i le matau atu, ua malosi lava le aumai i totonu o le atunuu o masini tetele nei e faaaoga i galuega tetele po o siligi. I le vaai i ai i le tóatele o i latou o lo o aumaia nei masini tetele, e le o lava le tomai o i latou po o operators - tagata o lo o faatinoina nei galuega. O lona uiga e tataua ona toe tuu atu i ai ma lea tulaga ina ia lava le iloa o le tagata e faatinoina nei galuega. Aua o le tele lava o i latou nei e omai ma masini nei aemaise lava totonu o lo tatou atunuu, e matua le malamalama lava. E ese le aumai o le masini, ae a fai atu i le mea e ave i ai le uta e le malamalama. O lona uiga o le tasi lea vaega e tele ina tulai mai ai faalavelave, ae tasi lenei matata e ese le taua i atunuu la aua e i totonu foi o le apprenticeship ina ia aoaoina uma machine operators ina ia malamalama i le faatinoina o galuega.

O atunuu la e tele lava ina faaaoga mea ia o signalman, a signalman is a certified man mai totonu o le apprenticeship . O i latou foi e aoaoina i le faatinoina o galuega i le faatinoina o masini tetele nei, aua o lau matau i galuega nei e fai i totonu o Samoa, a sisi nei se uta e valaau atu lava le tagata faigaluega i le ave masini, “Tuutuu i uta, tuutuu i tai.” A o tagata ua lava le potu ma le iloa i totonu o le apprenticeship e faaaoga o latou lima aua o la e i ai tusi faapitoa o tulaga ia. E omai lava la mea e tau o signalmen i totonu o galuega ua malamalama. E malamalama le operator ma malamalama foi signalmen i totonu o galuega.

Na o se tuualalo e avatu i lau Afioga i le Minisita ina ia faaopoopo atu i ai le tulaga lea mo le puipuia o galuega. Ma lou faaloalo lava, faafetai.

FOFOGA FETALAI: Tulai mai le sui usufono mulimuli lea, le sui usufono mo Falelatai ma Samatau.

Afioga TAEFU LEMI (Falelatai ma Samatau): Faafetai lava mo le avanoa lau Afioga i le Fofoga Fetalai. Ua ou tulai atu ona sa i ai foi se aafiaga i le faiga o le polokalame lea i le taimi sa faigaluega ai, ma e fia faamauiina ai lau faafetai i le Afioga i le Minisita ma le Matagaluega e ou le Tulafono Tau Faaofi.

O le tau amata mai o le polokalame lenei faa-aperenitisi, e tele lava nai toatuga ma nai faigata sa i ai. Ia manatua foi o le tagata faigaluega e faigaluega i le konekarate po o fea lava le mea o lo o faigaluega ai e maua ai lona malamalamaga – practical skills i le faatinoina o galuega, ona auina atu loa lea i le Iunivesite e faatino ai le aoga tusitusi ma le theoretical side o le aoga a le tama po o le tiene.

O aso la toetiiti lava a leai se pili o le tama po o le teine e totogia. O lea ou te manatua e pei na amata mai o \$10 i le term, e totogi lava e le tamaitiiti lana ia \$10, ae o le matuai utiuti o lona tupe i le faasoia a le Iunivesite i le faatinoina o aoga nei. E manatua foi, a faapea po o le uelo lea e alu atu ai le tamaitiiti, ia a uma loa ona susunu e le isi tamaitiiti le fasi uamea ma faaoga le uaea lea po o le rod, ia ona moomia foi lea o le isi fasi uamea ma le isi rod e faaoga e le tamaitiiti e sosoo mai ai. E le o se mea e mafai ona fai foi nei ma toe faaoga ma toe faaoga. O le ala lea e ala ai ona taugata ituaiga aoga faapenei, lau Afioga i le Fofoga Fetalai, ae e faamauiina lau faafetai i le Tulafono Tau Faaofi lenei ona o lea ua ou maitau, ua tolu vaega eseese ua togi maa ma fai sao i le atinae o le polokalame lenei, lea ua i ai le sao o le tamaitiiti lava ia, ua i ai le sao o le fale faigaluega la e faigaluega ai le tamaitiiti, ia ua i ai foi le sao o le tatou Matagaluega po o le tatou Malo.

O le tuualalo i lau Afioga i le Minisita, ua manaia lea fuafuaga ua i ai ua lelei, ae e tau lava ina ia tautuana e lau Afioga e moomia lava ina ia siisii laitiiti i luga, a moomia e maua le tomai i le aoaoina o le tama ma le teine, ia e manaomia foi nai vaega ia e moomia mo le faatinoga o aoga a nai tama ma nai teine. O le natura lava lea lau Afioga i le Fofoga Fetalai, o le faatinoga o aoga ia faa-Matata eseese po o trade. O le isi vala lau Afioga i le Minisita, ia aua pei lava o le mutaaga o ni polokalame faa-Aperenitisi, e maua loa lau certificate foi lea o le Due Completion faaauau lau galuega, ia ona e agai loa lea i le mea e tau o Trade Certificate, ia ona muta loa lea. O lau tatalo i lau Afioga i le Minisita, e oo atu i le trade certificate lea, o la lava e matuai sogasoga le mafaufau o le tamaitiiti, ae silasila i ai lau Afioga ma le Matagaluega, po o le a se isi faiga i luga atu o lona faiga, ina ia oo i ai le mafai ma maua ai pea avanoa o nai alo ma fanau e feololo le taumafai.

Lau Afioga i le Fofoga Fetalai, o nai motugaafa ia, faafetai.

FOFOGA FETALAI: Malo faafetai. Tulai mai lau Afioga i le Sui Palemia e talifuaitau i saunoaga a sui usufono mamalu.

Tofa Hon FONOTOE NUAFESILI PIERRE LAUOFO: Faafetai i lau Afioga i le Fofoga Fetalai, ia ua faalogologo foi ma le totoa i saunoaga i lenei taeao i sui usufono sa saunoa, ma e maitauina i le aoatetele o saunoaga o lenei taeao ua faaalua le agaga faafetai, o le agaga lagolago i leni Tulafono Tau Faaofi, aua o i lea ua taumafai mai ai faiga fou ia saga atili faamapuepue ai ia le tulaga e le gata i le Aperenitisi e faapea foi tulaga o mataupu o lo o aotauina ai ia Aperenitisi, e faapea foi vaega o kamupani o lo o faapena ona fesoasoani i le faatinoga o le itu lea o le practical.

O le agaga lava lena lau Afioga pei foi o le tele o kamupani, ia o lo o faapena ona faatalatalanoa ma sui o le Komiti Faatonu i ni avanoa mo fanau nei ia faapena ona maua le practical side o le aoga i kamupani. Ia o lona uiga o tulaga foi lea e fuafua i avanoa ma le manaomia e le kamupani, e le o se tulaga e faamalosiina le kamupani e avatu i tamaiti e faa-galulue ma aoao

ai le tulaga o le faatinoga o galuega, ae le o gafatia e le kamupani. O le mea lea e momoli ai foi le agaga faamalo ma le faafetai i kamupani o lo o faapena ona maua ai avanoa ma ofoina mai avanoa ma o lo o maua avanoa e fesoasoani ai, e le gata i kamupani ae maua ai foi le faamanuiaga a le tamaitiiti ia e maua ai le potu masani i le faatinoga o nei galuega. O avanoa tutusa o lo o maua avanoa tutusa i le polokalame lenei, pei lava foi ona tau faamatala atu, pei o mea lava ia sa sau ai i ia aso o matata eseese lava e agai i ai alii talavou. O nei onapo pei ona faamatala atu i isi faauuga ia talu ai nei, ia o lea ua faauu ai ma tamaitai. O le mea la lea e momoli atu ai le faamalo ma le faafetai foi i ia tamaitai i lo latou sogasoga ma le agaga finau e omai e finau i totonu o matata eseese o lo o faapena ona toatele atu ia alii o lo o faapena ona aotauina ai ma galulue ai, ia o le agaga fiafia lena, e le faapea o i ai se pa puipui. O lona uiga o ai lava tamaitai ua ausia le tulaga agavaa foi lea e mafai ai ona ulufale i le polokalame, e maua lava le avanoa, e le o i ai se tulaga faapea o faailoga foi lele ia tamaitai i se tulaga maualalo, o le tulaga lena o lo o maua uma a tatou avanoa faapena. E manatua o matata eseese nei e manaomia tele e atunuu e i ai lo tatou atunuu, o atunuu foi ia tau atiae, aemaise lava la pei ona maitauina i taimi foi ia ua tetele tulaga o lologa pe aafia foi i tatou i afa ma tsumani, e tele ia maota ma laoa ua faaleagaina, o taimi ia e manaomia tele ai ia matata eseese nei po o ituaiga galuega nei e faatino i taimi faapena. O le mea foi lena o lo o taumafai i ai le Malo ma le tatou Matagaluega, ia uunaia lava le polokalame lenei ina ia aua ne'i i ai se tulaga foi lea o le lē lava ia po o le utiuti foi o latou ua agavaa e faatino ia galuega faapenei.

Masalo e le toe tele sau tala i le occupational safety and health, lea ua saunoa faamalamalama i ai nisi o sui usufono o le Maota. O le tulaga lea o lea na toe faaleleia atili ia le tulaga lea i le Tulafono lea na tatou pasia talu ai nei pei lava o le tausaga nei, lea na tatou pasia ai le Labour and Employment Relations Bill, Tulafono lea mo Tagata Labour ia ma tulaga o galuega i fale faigaluega i vaega ia tumaoti po o le private sector. O le vaega la lena o lea ua aumaia ai se aiaiga fou e faaleleia ai ma toe siitia ai le tulaga o le saogalemu i le faatinoga o galuega faapenei, aua o lo o manaomia ai le tulaga o lavalava po o vest, pei ona maitauina, ua tele ina faaaoga ia vest, o pulou, o seevae faapena pei ona saunoa ai se tasi o sui usufono mo mea o steel capped boots, ia o tulaga na e manaomia aua lava le saogalemu. E manatua e i ai le vaega e sootai ma le vaega lea o le safety, e tau lava ina ou avatu faapea e fesootai ma le tatou vaega foi lea o le ACC, o iina lea e aumai ai faamalosia ai foi tulaga o le saogalemu i le tatou Matagaluega po o le Faalapotopotoga o le ACC o latou na e nafa ma ni tulaga la faapea i ni tagata pe a tulai mai ni faalavelave i nofoaga o fale faigaluega. Ia o le aveina o le masini, ia ou te masani e le tele sau tala i lea vaega, o mea na e aoao, ae silasila foi, o so o se aveina lava o se taavaleafi po o se masini e manaomia ia laisene faapitoa, o laisene na e le gata afai ua e maua lou potu masani po o lou silafia e ave ai le masini, e manaomia lou laisene faapitoa mai le LTA aua le faaaogaina o le masini ia fetau ma pasia ia tulaga faapena. Ia o aso nei, ua tau le faaaogaina mo signal men, o mea na sa tele i aso la, o aso nei ua tele ua i ai lava mea o camera foi ia i totonu o masini faaonaponei, e faapea foi mea o computer e faatonutonu mai ai masini, sei vagana ai la masini tuai o masini foi ia ua tuai i aso la, ia pei o lea la e faamoemoe isi vaega foi lea o lo o tatou vaaia i le omai ma

laupapa foi ia e faasinosino le mea e tu tonu ai le vaalele, ia pei o le vaega lena, a o le Tulafono fou lenei, lea ua aoga tonu lava i mea faapena....

FOFOGA FETALAI: Sei malie lau Afioga i le Sui Palemia, o le a le isi mea le sui usufono mo Faasaleleaga Nu. 4 o lea ua saunoa malamalama le....

Afioga Peseta Vaifou Tevaga: Lau Afioga i le Fofoga Fetalai, e na o se mea e fia fesoasoani atu i le saunoaga a le Afioga i le Sui Palemia i mea nei o masini, ona o lea na ou lauga i le masini, o le masini lea na avatu i lau lauga mea foi nei o crane siligi, cranes nei e le o break mai i totonu e faaoga mea o signal man, aua a maua i le ea, e le mafai ona alaga atu le tagata i lalo i luga e faaoga lima, lima laitiiti, e sau lava i le lima matua o lima nei ua uma ona faatulafonoina i totonu o le aoga lenei o le Apprentice. O le uiga lena o lea e tau faamamafa atu ai le tulaga lea, e le talanoa i....

FOFOGA FETALAI: Ia o lea ua maua lou finagalo lau Afioga i le sui usufono mamalu ma o lea foi ua tali malamalama, malie le sui usufono mo Faleata Sisifo e te lei saunoa i le mataupu o lea ua tali le Afioga i le Minisita.

Tofa Lealailepule Rimoni Aiafi: Lau Afioga i le Fofoga Fetalai ona o lea ua malamalama faaii le saunoaga a le Sui Palemia.

FOFOGA FETALAI: Ia.

Tofa Lealailepule Rimoni Aiafi: A saunoa le sui usufono mo Faasaleleaga Nu. 4 e tataua ona amanaia e le Sui Palemia, pau lea o le sui o Samoa na ueloina le Apolo 11 na ae lea i luga o le crane lea e fai, o lea la ou te fautuaina lau Afioga, se faaoga le tuualalo a le Afioga i le sui usufono mo Faasaleleaga Nu. 4.

FOFOGA FETALAI: O le mea lena na le taunuu ai le Apolo ona o le faaletonu o le mataupu lena. Ia tulai maia lau Afioga i le Sui Palemia.

Tofa Hon FONOTOE NUAFESILI PIERRE LAUOFO: Masalo o le tulaga tonu lena lau Afioga i le Fofoga Fetalai, o le Apolo e lei au i le masina, a o le tulaga lena, masalo o lau vaai i le tele o isi cranes ia e i ai nei o isi fausaga tuai, e lei oo mai iinei fausaga fou na e i ai mea pueata na ma camera i luga o tumutumu i le vaai mai i lalo, e nofo lava la le ave masini lea i totonu o lona pusa foi lea e ave ai le masini ae o la e tilotilo uma i mea o camera foi ia mo ata TV i le mea faatonutonu e alu i ai le crane o masini faaonaponei na, ia silasila la i ai i le maoae o le tulaga ua oo i ai le tatou Tulafono, o lea lava e aofia ai ma le vaega tuai ia. Pei o le vaega lea lau Afioga i le Fofoga Fetalai, o le Tulafono lenei o lo o faapena ona toe siitia ai tulaga o a tatou Aperenitisi. O le galuega lava ia o lo o fesoasoani ai ia tulaga i gauta i le aoga pei ona saunoa i ai se tasi o sui usufono le Afioga i le Minisita Lagolago le sui usufono mo Falelatai ma Samatau, atonu foi ua leva ona galue ai i gauta i le Polytech ia le Afioga i le Minisita Lagolago o lo o silafia tulaga ia a o mea ia o lo o faapena ona aofia uma i totonu fuafuaga a le tatou Iunivesite e i ai mea ia mo le faamalieina o sapaia o mea e manaomia aua le faatinoga o aoga faapenei.

Lau Afioga i le Fofoga Fetalai, pei o le tali atu lea i nisi o mataupu sa laga e sui usufono mamalu.

FOFOGA FETALAI: Malo faafetai.

Na faamaonia le lafo ma faitauina le Tulafono Tau Faaofi o Aperenitisi 2013 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o Galuega, Felauaiga ma Siosiomaga mo le iloiloaina ma toe lipoti mai i le Fono Aoao i se Fonotaga o lumanai.

TULAFONO TAU FAAOFI O TEUTEUGA O LE TULAFONO O PULE O VAEGA FANUA 2013 – faitauga faalua

FOFOGA FETALAI: Mo le silafia e le Palemene o le Tulafono Tau Faaofi lenei sa faia lona faitauga muamua i le aso 6 Aokuso 2013.

I le toesea ai o le Minisita mo Punaoa Faalenatura ma Siosiomaga, ou te tapa ai le Afioga i le Palemia e tulai mai.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai i le toesea ai o le Minisita mo Punaoa Faalenatura ma Siosiomaga, ou te tulai atu ai e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Pule o Vaega Fanua 2013 i lona faitauga faalua ma ou te fia tautala faamalamalama i ai.*

Faaluaina e le Sui Palemia, Minisita mo Fesootaiga ma Faamatalaga Tekonolosi, ma le Minisita mo Tina ma Tamaitai, Atinae o Nuu ma Afioga ma Agafesootai.

FOFOGA FETALAI: Ia e manatu ona o lea ua tatou taunuu i le tatou taimi malolo lau Afioga i le Palemia, o le a sei mapu ane mapu ifo lo tatou Maota o le a tuuina atu le avanoa e saunoa faamalamalama lau Afioga i le Tulafono pe a tatou taliu mai i le tatou malologa masani o le taeao.

Ou te faasilasila atu ona o le faaletonu o le tatou Maota i tuafale, o lea o le a liliu mai ai alo o le lupe o le tatou malu taeao i faleie ia ua saunia i le itu lea o le Maota, ona o le timuga ma faaletonu sa i ai i le taeao nei, ua manatu ai e le talafeagai ma lo outou paia ma lo outou mamalu.

Ae malie le tatou Palemene o le a tatou inu ti i faleie ia ua tapena i le itu taumatau ua saunia tulaga pei ona logoina atu.

Ou te faasilasila atu o le a faataatiaese Taulumaga a le Fono Aoao Faitulafono i lana malologa masani o le taeao.

Na faataatia ese Taulumaga a le Fono Aoao mo lana malologa masani i le itula e 10:42 i le taeao ma toe faaauau i le 11:21 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofa Faitulafono. E talitonu ua maua le faatiliga malosi, e manatu foi o se siosiomaga fou ua tatou mafuta faatasi ai i lalo ifo o lenei faleie i lenei vaega o le aso, ua tatou maitauina ai le agiagi malu mai pea o le savili i Tiafau nei aemaise le taumafai mai o le Failautusi o le Fono aua se taliga sua aua lo outou paia ma lo outou mamalu. Ia, o le a sagai atu loa le tatou Fono aua le faaauauina o tatou galuega o le aso.

E faia le tatou malologa o le a tulai mai le Afioga i le Palemia e fai ma sui o le Minisita mo Punaoa Faanatura ma le Siosiomaga i le Tulafono Tau Faaofi o Teuteuga o le Tulafono o Pule o Vaega Fanua 2013. Ou te talosaga atu i lau Afioga i le Palemia mo lau saunoaga faamalamalama.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, faamalo atu o lea ua sao i alo le faasiliga malosi i Afioga i sui usufono mamalu e toe faaosofia ai le malosi o le tino ma le mafaufau e faafeagai ma so o se ituaiga galuega o lo o totoe i le va o le aso ma le aso e faamaea ai a tatou Fonotaga.

O le Tulafono Tau Faaofi lenei, o le Tulafono Tau Faaofi o lo o faalupe o le Tulafono Tau Faaofi e Teuteu ai le Tulafono o Pule o Vaega Fanua 2009, o le Tulafono Autu lena. E suia ai upu ia; teuina o ata o fanua i lalo o le Tulafono o le Faamauina o Fanua 2008 i upu nei, faamaoniga o le ata i lalo o le Tulafono o le Fuaina o Fanua o Fanua 2010. Ma e suia ai upu ia, lautusi faanumeraina, computer ma pepa faaopoopo, faamaumauga i upu nei, lautusi faanumeraina o le lesitala. Ina ia malamalama atili, i le Gagana Peretania, “The Bill seeks to amend the Unit Titles Act 2009: to change “deposit of the plan under the Land Titles Registration Act 2008” to “approval of the plan under the Survey Act 2010”; and to change “computer folio” and “supplementary record sheet” to “folio of the Register”.

O le Tulafono Tau Faaofi lena. E matua leai ma se isi e malamalama ai, ae le o i i foi le Minisita e faamalamalama atu ia te outou.

Lau Afioga i le Fofoga Fetalai, o le ki atoa o le Tulafono Tau Faaofi lenei, o lo o maua i lalo o upu ia o le Unit Titles, lea o lo o faa-Samoaina, o le Tulafono o le Pule o Vaega Fanua. Ua atili ai ona nunu o le toau. O le Unit Titles Act, o lea la o le a ou taumafai e faamatalaina atu. O le Unit Titles Act, o le isi lea faiga fou, Unit Titles, lea ua faaogaina e le aufaipisinisi i aso nei e fai ai ni atinae tetele ae moomia ni tupe se tele. Mo se faataitaiga; a outou manatua le amataga o le faletalimalo foi lea i Taumeasina, na folafola ai i totonu ma pasi Tulafono a le Maota lenei, e USD\$300miliona o le a fausia ai. Na pasi, pasi foi e le Kapeneta ma le anoano o faamanuiaga na avatu i ai. Ia ona o loa lea o tagata nei o sue mai tupe e faatino ai le atinae. Na iu lava ina talosaga mai foi i le Malo a o ou Minisita o Tupe ma ou alu ai foi e taumafai e talanoa i isi faalapotopotoga tau tupe e fesoasoani i le talosaga a le vaega lea, o lea e i ai i tua le Malo. Ia, ua fiu, ua uma ane lava, na o le tamai motu lava la e tutu i tai. Ua oti nei lena tagata, e leai se tupe e maua. O le mea la lena o lea e tupu i le tele o atinae, e sili atu i le \$100miliona, \$200miliona, \$300miliona, \$400miliona, \$500miliona le tau, ae leai ni tupe a tagata nei e omai e fuafua e fai ni atinae tetele. A o le latou faiga e masani ona fai o le o e talanoa ma faletupe. E i ai la le faiga lea Unit Titles lea ua agai tele i ai nisi o kamupani latou te taumafai e sue mai ai ni seleni. E faapea le faiga; a faapea o se faletalimalo e \$400 pe \$500 miliona le tau e fau ai, ona sue sue lea, o le

isi la auala e faatino, o le taumafai e fau le fale, a faapea e 100 potu, ona sue lea o tagata e lisi i ai potu nei, lisi i ai pe faatau i ai ma fai i ai, ae a la pe a e malie, o le tau o le potu lea e miliona, tusa lava o lou fale, a o le potu, e alu ai ma le eleele lea e tu ai le potu.

O le ala la lea e talanoa mai ai le Tulafono Tau Faaofi lea, o le vaeveaga o le plan aua o ituaiga mea faapea e tataua ona faataoto le ata ina ia atoatoa. O le faiga la e masani ona fai, a faapea ua fau le faletalimalo e 100 potu, e 100 foi tagata ia ua sao i ai ua umia e latou po o le umia saoloto po o le umia i se tulaga faa-lisi, ona faapea lea; o le a tuu atu le potu lea e aveva o se vaega o le faletalimalo. A o le fitu aso mai le aso 1 o Tesema ona o le tagata lea e nofo i Peretania. O lea la, a oo i le aso o le kerisimasi, e fia lele mai i Samoa ma lona aiga ona omai loa lea e tafafao iinei. O le fitu la aso ia, 21, 22, 23, 24, 25, 26 ma le 27, ia faavagavaga le fitu aso lea mo ia ma lona aiga, o lea la faatoa sau o latou ia e ana le potu lea numera 40 ua i ai uma lava mea uma i totonu o le potu lea, ona omai loa lea faaoga loa e latou, ona aveese mai loa lea, o lea la faatoa omai e faaoga lo latou potu. A uma foi, ona toe o lea ae toe see le potu lenei i lalo e aveva o se vaega o le faletalimalo. A alu alu la ua uma le tausaga, ona faapena lea ona toese le tai fitu aso, aua o isi e omai na o le lima aso o le tausaga e faaoga ai e latou ma o latou aiga le latou meatotino. Ona toe o lea ae toe tuu mai le potu e faaalu o se vaega o le hotel. A oo la ina oo i le faaiuga o le tausaga, ia, ona fai foi lea o tusi, aveane le tupe maua e \$1piliona, tupe alu e \$800miliona. O lona uiga, e \$200miliona le tupe mama ona aumai loa lea o le tupe mama faasoasoa ia i latou e ana potu ia. O le uiga tonu la lona o le Unit Titles Act, o le Tulafono Tau Faaofi lea e mafai ai ona fai ni faiga faapea. E pei o se faiga lea a tatou e taumafai e uunaia le atinae lenei o faletalimalo, ona pau lava le faletalimalo aupito tele na fau e le Malo o le Tusitala i le tausaga e 1972 na fau ai le Tusitala. Ona uma loa lea ona fau ma le manatu foi lele o le a lelei le faaalualuga. Mai lava i le 1972, 1973 seia tau mai lava i le 1989, na o le gau, gau, gau, i tausaga uma, tausaga uma, tausaga uma. O le ala lona na fai ai loa le faaiuga i le tausaga 1989 a o aveva au ma Minisita o Tupe e sili loa ona faamatuu i tua, e omai tagata i tua e run le faletalimalo, afai lava e gau ai, fai e latou. A o le manuia i le atunuu lautele e tumau pea. E pei la o le tulaga lona, mai lava i le taimi lona, e le i toe sau lava se faletalimalo tele faapea e 100 potu ia Samoa na o le fai lava o lea konekarate ma palalu, fai lea konekarate palalu. Na o le anoano o le mau tagata e omai ma le lototele ae leai ni seleni e faatino ai. O le tasi la lea faiga ua fai e tatou, ae i ai la le faletalimalo lea ua faatino i le taimi lenei, lea ua faaoga ai le system lea o le Unit Titles.

O le tulaga la o le Tulafono Tau Faaofi atoa lava, o le faafaigofieina o le faiga o plans i le vaeveaga, o faiga o valuation, o le resitalaina o mea o mokesi ma mea uma faapena i tulaga i le va o latou e ana le meatotino ma latou ua lisi i ai, pe faatau foi i ai.

Lau Afioga i le Fofoga Fetalai, o se faamatalaga puupuu lava lona e tatau faamanino ai le lavelave o le Tulafono Tau Faaofi lenei, ia manuia tele le tatou Fono.

FOFOGA FETALAI: Malo faafetai i le saunoaga faamalamalama a lau Afioga i le Palemia. O lea e maitau atu o lea e tulai mai le Sui Taitai o le Itu Agai, tulai mai le sui usufono mo Falealupo.

Afioga Hon AEAU PENIAMINA LEAVAISEETA (Falealupo): Lau Afioga i le Fofoga Fetalai, faafetai tele mo le avanoa. E puupuu lava se sao i le tatou Tulafono Tau Faaofi lenei, ma e puupuu lava. Ua faafofoga foi le pau o le Maotaga nei i le faamalamalama a le Afioga i le Palemia. E puupuu lava, ma ua tataua ona puupuu. E ala ona tataua ona puupuu i le maitau a lenei usugafono, o le faasaosaoina po o le faaleleia atili po o le toe fesui, o le Tulafono lenei na oo mai i le Laulau a Fono lenei i le 2009. O lona uiga, o le Tulafono lenei i le 2009, se i faatinoina le Tulafono Autu ona o faatasi ai lea. O le taimi lenei e le i faatinoa la. O lona uiga, tusa o lea e i luga o le ea le Tulafono lea i le taimi lenei. Ae i ai nai fesili laiti lava ia lau Afioga, ou te tau le malamalama i le igoa o le Tulafono lenei 2009, Pule o Vaega Fenua, Pule o Vaega Fenua. O lona faapalagi, Unit Titles. Ia, o mea nei ou te talitonu e le finau ai se isi o mea mai le loia ua uma ona pasia, e leai foi se isi e toe suia ni mea e faatinoina e loia ma lelei le faatinoga. Po o le a le mea e le tuu ai i ai le Land Unit? Aua o le Unit e ave lava i so o se mea e i ai pusa, o a igoa o mea uma o units lava. Aua a faa-Samoa o fanua. A o le a le mea e le tuu ai i ai le Land Unit e iloa ai po o a Units ia e talanoaina?

O lona lua, toetiiti lava maua le 30 o vaega o le Tulafono o le 2009 lea ua toe faasaoina ma faaleleia atili ma ua tapenapena lelei i le 2013. E mafai ona faapea se manatu, e le i lava tapena la ma lelei aua o lea e le i faatinoina. E mafai foi ona faapea, e pei sa faatopetope le aumaiga o le tatou Tulafono lenei i le 2009. E mafai foi ona faapea, o Tulafono uma lava o lo o i lalo o le upu lea, “O le lisiina o fanua,” e le i atoatoa ona tapena. E tataua ona toe silasila totoa i ai le Malo i le tulaga lea.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai.

FOFOGA FETALAI: O le a se i avatu le avanoa i lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: O le mea ou te fiafia ai ona e poto tele e milomilo, milomilo mea. Tuu lou milomilo mea aua sa sao lava ona avatu. Ia manatua foi, ou te iloa e leai se Tulafono i lalo o le la lenei, se i vagana Tulafono a le Atua aua foi o le Atua na te silafia mea uma. A o tatou ma o tatou mata faapenei e puupuu lava le mea e gata mai ai le tatou vaai, ae e i ai mea e tutupu a o faagasolo le soifuaga lenei. O i ina tatou te amata ai ona iloa le mea e tataua ona fai, le mea e faaopoopo, le mea e toese ma le mea e teuteu, ae e le faapea na sese le Tulafono.

O lona uiga afai o le teuteu lava o lea mea fai mai na sese, o lona uiga o le matua sese lava o le tatou Faavae na pasi, ae e le i sese, sa sao le Faavae i le taimi na pasia ai. E faapena foi i lo tatou soifuaga, e i ai taimi tatou te iloa ai mea fou ua tutupu mai ona faapena foi lea ona tatou galulue e faatatau i ai.

FOFOGA FETALAI: Tulai mai le sui usufono mamalu; e manatu ua malamalama atugaluga i le Tulafono ua tuuina mai.

Tulai mai le sui usufono.

Afioga Hon AEAU PENIAMINA LEAVAISEETA: Afai ua malamalama, ua uma ai foi i inei, ae e pei o le agaga lea ua faataatia atu.

Ua ala ona taua le mataupu lea ona o le mataupu lenei i le lisiina o fanua tau Samoa. Lau Afioga i le Fofoga Fetalai ma le pau o le Palemene, e faitau eseese le atunuu i lenei Tulafono taua, Aisea? Ona e leai lava se isi i le Maota lenei e le aafia i le Tulafono lenei pe a faatino. Afai foi e faatino, e faatino ona o ooooga ia ua aumai ona e afaina ai le mamalu o aiga ma a latou meatotino.

FOFOGA FETALAI: O le a tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Tatou te le o talanoaina le Tulafono o Fanua. E ese mamao lava le mea lea tatou te talanoaina, o le unit titles lea tatou te talanoaina, ae tatou te le o talanoaina le Tulafono o Fanua aua ua uma ona fai i ai faaiuga a le Maota lenei.

Na o se faamalamalamaga e fesoasoani ai i le sui usufono mamalu o lo o saunoa nei.

FOFOGA FETALAI: Tulai mai le sui usufono e faaiu mai le saunoaga.

Afioga Hon AEAU PENIAMINA LEAVASEETA: O lena ua uma, faafetai lava a lailoa. O lea ua uma ona ou amata ai; na ou amata ai lava i le mea lena. Faafofoga foi i le igoa o le Tulafono, o le Tulafono Tau Faaofi o Pule o Vaega Fanua. Fanua mai fea? O fanua Samoa, fanua tau Samoa lea e fai i ai le Tulafono lenei. O lena ua ou malamalama, ae ona o ona tafatafa ane lena ma o lena ua manino mai.

E pei o le mea lea na tau atugalua i ai lou mafaufau ona e foliga e le o atoatoa lelei tapenaga a le Malo i le mataupu lenei. E 28 fuaiupu ia ua sui mai i le 2009, ae e le i amataina le tatou taaloga. O lona uiga e le o ato a tatou package. E pei o le agaga tonu lea o lo o tulimatai.

Lau Afioga i le Fofoga Fetalai, ua lava ai faapea.

FOFOGA FETALAI: O le a tuu atu ia le avanoa i le faamalamalamaga a le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: E tiga lava lou fia moe, ae saunoa loa le sui usufono mo Falealupo ola uma loa au antenna ona e eseese mamao lava le mea lea tatou te talanoa ai ma le mea lea na te aumai.

O le mea lea tatou te talanoa i ai o le Tulafono faapitoa. Na mafua ona faatulai ina ia faafaigofie ai tulaga ia i le faatinoina o mea nei o atinae e faaaoaga i ai ituaiga metotia ia faa-faipisinisi. E eseese mamao lava ma le mea lea e sau ai i mea nei o eleele tau Samoa.

FOFOGA FETALAI: Tulai mai le sui usufono mamalu e faaiu mai le saunoaga o lea ua malamalama ou atugalua i le tulaga na taua ai fanua tau Samoa.

Afioga Hon Aeau Peniamina Leavaseeta: Se i toe faasao le mea lea. Vaai i le igoa o le Tulafono lea, “Pule o Vaega o Fanua”, ae sau le mea lea o le unit, a o le a lafo atu ia ia te outou. E faaiu atu ai se matou tala lau Afioga

manu o maua le avanoa. Se i momoli atu lava lau faafetai i lau susuga i le Palemia i lau saunoaga matagofie i le tatalaina o le maketi i Taufusi. Faafetai lava, manaia tele le saunoaga a lau Afioga. A o le a se lagona o lau Afioga, se faamalosiua i le atunuu? Se talofa ia i latou? O lou manatu faapea e te afio i le mea lea ma ave se fesoasoani a le Malo pe \$1.9 miliona foi lea na mitiia e le ea, ae sa tatau ona ave se meaalofoa.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Na ona ou faamanatu atu i le Itu Agai. O le upu faaiu o le upu a le Malo, e le mafai lava ona faaiuina ni a tatou felafolafoaiga e se upu mai le Itu Agai ona o i ina e atili taitaiseseina ai faamaumauga ma taofi.

E ese mamao le maketi ma le Tulafono lea tatou te talanoaina, ese mamao foi ma le pulega o fanua e le o i ai i totonu i le mea lea o fanua tau Samoa. E le o i ai i totonu i le faasologa o Tulafono i le taeao lenei. O le mea lenei e umi ai a tatou fonotaga, o le tuu o le mataupu ae tatou agai i mea e le o aumaia i totonu aloaia i a tatou fonotaga. Pe ana faapea e le i tofia le sui usufono o lo o tulai mai pea lea na ou palota i ai ina ia avea ma Fofoga Fetalai i le Vaega lenei. O le mea lena i le taimi na tulai mai ai i le 1988 i le 1990, ana ou iloa o lea lava e faapea e le i suia, ou te le palota i ai i lena taimi, ma o lea lava e tau faatonutonu atu le sui usufono e tusa ai o ana faasalalaga sese ia e taumafai e taitaisese ai le Maota lenei.

FOFOGA FETALAI: E manatu ua manino ma malamalama le saunoaga a lau Afioga i le Palemia. Le sui usufono mo Falealupo, o lenei lava ou te piiama atu ona o le ava tele atu. O lea e tau pipii atu ona o le tulaga i Tulafono Tumau ma le faafogafoga a le tatou fonu. O le a tuuina atu le Fesili.

Tofa Lealailepule Rimoni Aiafi: Lau Afioga i le Fofoga Fetalai.

FOFOGA FETALAI: Tulai mai le sui usufono.

Tofa LEALAILEPULE RIMONI AIAFI: Faafetai i lau Afioga i le Fofoga Fetalai mo le avanoa.

A tatou talanoa loa i fanua, ia e maaleale le mataupu lena ma e tatau ona mataala uma i se taimi e talanoaina ai mataupu tau fanua ina ia faaalua i ai ni o tatou manatu. Peitai, e eseese foi tulafono, tatou te vaai i itu e lua, o le itu o lo o i ai vaivaiga ma Tulafono o lo o aumai ai ni faamanuiaga.

O le Tulafono Tau Faaofi lea ua tulai mai nei, o lou lava sui usufono, e ave i ai lau lagolago ona ua leva foi ona ou taumafai mai i le taimi na ou tulai mai ai i le Palemene i vaega nei e pei ona tau faamalalamalama i le taeao nei, aua e le gata i tagata mai fafo a o o tatou lava tagata, ina ia mafai e o tatou faipisinisi ona atiae i ituaiga avanoa faapea. E ala ona fai lau tala ona e i ai le tamaloa lea na sau mai fafo e fai le malae tapolo lea e i o i Mulifanua. O le aano tonu na fau ai e le tamaloa le malae tapolo ina ia i ai ma fale nei faapenei i luga ina ia maua ai se avanoa lelei, e le gata ina faatoateleina ai tagata mai fafo, a o o tatou lava tagata. A e fia alu e te tapolo ai i o, e mafai lava ona oulua o ma sau paaga po o sou aiga fau ai lo outou fale i luga o le fanua lea. E faatinoina faapisinisi e pei ona famalamalamaina e le Afioga i le

Palemia. Ia te au lava ia, e leai se popolega i le leiloa atu ai o fanua nei aua o lea e malu puipuia, ma o le ala lea e ave ai lau lagolago i le mataupu lea i le tulaga o fanua nei. Pau lava le faafitauli o lea ua faapea ona pasia le Tulafono ae ua gau foi le malae tapolo a si toeaina. O le mea e tatau ona tagai i ai le Malo ona e eseese itutino o le Malo i laufanua nei. Afai o lea ua aumai le Tulafono i lalo o fanua patino i lalo o le Land Board fanua tau le Malo, ae manatua e i ai foi Tulafono a le Pulega o Malae Vaalele po o le Samoa Land po o le STEC, e i ai foi a latou Tulafono e aiaia ai o latou foi fanua. Afai la i lalo o le Tulafono lenei e faataga ai e lisi fanua nei i le tapulaa pe 10 tausaga pe 20 tausaga le umi, e le mafai la ona faatino ai ni ituaiga atinae faapenei. E tatau ona tagai i ai le Malo ina ia i ai se Tulafono e ta aofai uma ai fanua nei o le Malo e pei o le Tulafono lea na aumai ananafi tatou talanoaina foi, lea e le i oo mai i le Palemene, a o lea ua finagalo le Matagaluega e tuu i luga le lisi o fanua mai le 5% o fanua ia e faamatuu atu mo atinae, aemaise lava i faletalimalo, a o lea foi ua aumai le Tulafono e patino lava i fanua ia e i lalo o le Land Board. E le o aafia ai fanua ia e i lalo o isi Pulega a le Malo, ae tatau ona vaai i se Tulafono e ta aofai uma ai fanua o le Malo aua o le mea lava e tasi ma o le matavai lava e tasi ina ia faigofie ai atinae i pisinisi e faatino ai vaega ia. Aua o le mea lea e i ai ne a uma le isi Matagaluega, faamalieina le Tulafono a le isi Matagaluega toe tau o foi e faafesagai ma le isi Matagaluega ona e ese foi le latou Tulafono. E pei na o se vaega lea e avatu ai se tuualalo i lea vaega i le mataupu o lo o talanoaina.

Ma le isi vaega, atonu e le o le Tulafono lenei ae a fai lava i fanua, e toe fautuaina lau Afioga i le Loia Sili ma le Matagaluega se i toe tagai ane lava i le faatauina o fanua, tagata agavaa lea i lalo o le Land Initial Act o le 1972. E talitonu e tele le faaletonu lena pe a toe tagai ane i ai. E i ai vaega na e feteenai ai ona o lea ou te iloa ona o le mea lea ou te nofo ai i lou itumalo, o lo o taamilomilo atu i i, tau ane i o. Ou te musu e tau atu aemaise lava i nai tagata ia mai fafo i Saina ma fea. Ua faatau fanua, ona fesili lea, e faapefea ona faatau? Ae ou sau faitau i le Tulafono, e i ai vaega o le Tulafono e faatagaina ai i latou e le ni sitiseni Samoa e faatauina fanua. Fanua ia tumaoti, ae fautuaina e toe tagai lelei i vaega ia. O tatou uma o le Palemene, tagatagai i vaega ia aemaise lava i le vaega lea, e moni e le o aafia i le Tulafono ae fai mo le agai i luma.

FOFOGA FETALAI: Faafetai saunoa. E manatu ua malamalama.

Lau Afioga i le Palemia pe i ai se isi mea e te toe fia saunoa i ai? O lea ua maea sui usufono e fia saunoa i le Tulafono.

Susuga Hon Tuilaepa Fatialofa Lupesoloai Aiono Neioti Sailele Malielegaoui: Lau Afioga i le Fofoga Fetalai, o le isi lea metotia e masani ona faaaoaga e le Pulega, o le ala lea o lea e faateleteleai ai ituaiga pisinisi tetele. Mo se faataitaiga, ona o pisinisi foi ia e fausia taavale. A o le Maota e matamata i le fausia o taavale, e i ai le laina e sosolo mai ai le taavale, pe na o le lima minute ua uma ona fau le taavale. E sosolo mai lava le taavale, e tasi lava lau mea e fai, na o le faapipii o le pau e tasi, sau i le isi tagata faapipii le pau e tasi, sau i le isi tagata faapipii le pau e tasi, au i le isi tagata faapipii le ave. E le faia uma e le tagata pe toatoluselau tagata e fauina le taavale, ae faasolo mai lava i le laina, e faasolo mai lava alu ae i o, faapipii e le isi le moli e tasi. O le faiga lena e atili tele ai lou malamalama i le mea lava lea e

tasi e te faia ma atili vave ai ona fausia se taavale ma tuufaatasi se taavale, ma atili ai ona agai i luma le lelei o le faatinoga o galuega. O i ina e fanau mai ai le ituaiga malamalama foi lea, centralization vs decentralization. A tuu i se pulega e tasi, o le matua tele o le faafitauli. E oo mai le faasologa i le faaiuga o le mataupu a le isi Department ua alu le tausaga. E faapena le mea na tupu i le mea lea na tupu ai le teva a le Malo i le 1981, ona e na o le vaega lea sa tau faatino e le PSC ona fai faasolosolo lea, uma lea Department faasolo atu i lea Department. E uma ane le tausaga na o le tolu pe fa Matagaluega a o la e faatali mai isi Matagaluega. E uma ane ua alu le faalua a le isi, ae le i oo le faasologa muamua i le isi Matagaluega ona o le mataupu lea e tataua ona decentralize. O le mafuaaga foi la lona na toe faatulai ai e le Malo le tribunal faapitoa mo le latou galuega lea i le faatulagaga o totogi, ona faatino atu lea i o faatino e Matagaluega.

Lau Afioga i le Fofoga Fetalai, o le mafuaaga lona na ala ai ona tuueseese mea ia, decentralize ina ia televave ai le faatinoga o tatou galuega ma televave ai le atinae. Lau Afioga i le Fofoga Fetalai, na o le pau lona o le toe faaopoopo atu e faamalamalama atili ai se mataupu.

FOFOGA FETALAI: Malo faafetai. Ou te manatu ua malamalama le finagalo o sui usufono na laga e uiga i lenei Tulafono Tau Faaofi taua.

Na faamaonia le lafo ma faitauina le Tulafono Tau Faaofi o Teuteuga o le Tulafono o Pule o Vaega Fanua 2013 i lona faitauga faalua.

FOFOGA FETALAI: E tusa ai ma le Tulafono Tumau, o le a tuuina atu le Tulafono Tau Faaofi i le Komiti o Galuega, Felauaiga ma le Siosiomaga mo le iloilo ma toe lipoti mai i le Fono Aoa o se Fonotaga o lumanai.

TULAFONO TAU FAAOFI O TAUMAFI 2013 – faitauga faalua

FOFOGA FETALAI: Mo le silafia e lenei Palemene, o le Tulafono Tau Faaofi lenei sa faia lona faitauga muamua i le Aso 6/8/2013. Tulai mai lau Afioga i le Minisita mo le Soifua Maloloina.

Afioga Hon TUITAMA TALALELEI TUITAMA (Minisita mo le Soifua Maloloina): Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o Taumafi 2013 i lona faitauga faalua ma ou te fia tautala faamalamalama i ai.*

Faaluaina e le Minisita mo Faatoaga ma Faigafaiva ma le Minisita mo Aoga, Taaloga ma Aganuu.

FOFOGA FETALAI: Tulai mai lau Afioga i le Minisita mo le Soifua Maloloina e saunoa faamalamalama i le Tulafono Tau Faaofi.

Afioga Hon TUITAMA TALALELEI TUITAMA: Lau Afioga i le Fofoga Fetalai ma le mamalu o lenei Fonotaga, o lenei Tulafono Tau Faaofi o Taumafi 2013 ua fai sina leva o faagasolo mai talu mai le tausaga 2009. O le

Tulafono Tau Faaofi o lo o pulea ma faafoe ai le mataituina o le saogalemu ma le atoatoa ona lelei o taumafa i le taimi nei, o le Tulafono lea o Taumafa ma Vailaau 1967. E le gata la i le atiaeina o taumafa, ae faapea foi i le itu o vailaau. O lea ua alagata ai ona tuueseese se Tulafono o Taumafa ma se Tulafono o Vailaau ina ia agavaa ai ma talafeagai ma ia suiga.

Ua mataituina foi le tulaga tuai ma le le toe agavaa o le Tulafono o lo o i ai nei o le Food and Drugs Act 1967, po o le Taumafa ma Vailaau 1967, e faafoeina ai le tele o suiga fou o le saunia ma le gaosia o taumafa faatasi ai ma luitau ma faafitauli e lamatia ai le saogalemu o taumafa ma ua tata ai lava ona aiaia ia tulaga i se Tulafono fou. O le faavae lea o le fausia o lenei Tulafono fou, o le Food Bill 2013, po o le Tulafono o Taumafa 2013. E matua tele ma lautele le taumafaiga i le tapenaina o lenei Tulafono Tau Faaofi. O le tuufaatasiga o lenei Tulafono Tau Faaofi, sa nafa ma Allen and Clerk Consultants o lo o faamautu i Niu Sila. O le tuufaatasia foi o lenei Tulafono Tau Faaofi, sa faatinoina foi ma le seu silasila i le tulaga o lo o i ai nei Samoa ma lona ofi atu i le Faalapotopotoga o Fefaatauaiga a le Lalolagi, WTO. Ua faia foi lenei Tulafono Tau Faaofi ma le amanaia ma ia ogatusa ma aiaiga o le International Food Code, po o le tulaga puipuia aloaia faava o Malo mo le mataituina o taumafa po o le CODEX Alimentarian. E valu vaega o lenei Tulafono Tau Faaofi, ma o le Vaega muamua o lo o agai lea i le Faatomuaga, Igoa, Faamatalaina o Uiga o Fuaitau, Faamoemoega o le Tulafono e pei ona i ai le faamautuina ma le faamausaliina o le saogalemu o taumafa ma le agavaa o taumafa eseese mo le taumafa e tagata, faatasi ai ma le faamautinoaina lea o le aoga tatau o nei taumafa mo le malosia ma le manaoga o le tino o le tagata. O lo o agai foi lenei vaega muamua i le taofiofia o faamatalaga le sao pe tufaasese e agai i le faatauina atu o nei taumafa. Ma ua silasila foi lenei vaega i le tulaga o le ogatusa o taumafa i Samoa ma ia noatia i maliliega faava o Malo ma isi atunuu o lo o i fafo.

O le Vaega 2 o lo o tagofia ai tulaga o ituaiga meaai, e aofia ai lo latou saogalemu, talafeagai lelei ma le taumafa, faamatalaga le sao o lo o faaaogaina e nisi ina ia faataulia ai le faatau atu o taumafa, igoa tusitusia e faalauiloa ai meaai, aso e gata ai le lelei o taumafa, po o le best before dates, ma aso e faamuta ai le faaaogaina o taumafa po o le expiry dates, taumafa mo tamaiti ma lo latou saogalemu, taumafa faaulufale mai ma taumafa auina atu i fafo, suesuega o taumafa e faaulu mai.

O le Vaega 3 o lo o agai lea i pisinisi tau taumafa o lo o aiaia ai laisene o pisinisi o lo o nafa ma taumafa, e aiaia ai foi le faatauina ina ia mafai ona tuliloaina i latou uma e faatau mai ai oloa tau taumafa o lo o faaaogaina i le faatinoga o lea pisinisi.

O le Vaega 4 o lo o aiaia ai matafaioi a le Matagaluega mo le vaai lelei ma le saogalemu o taumafa.

O le Vaega 5 o lo o aiaia ai le asiasia o nofoaga o lo o saunia ai taumafa ma le sailiina o le lelei ma le saogalemu o mea o lo o faaaogaina mo le taumafa. E aofia ai foi ma malosia e ufi ai ma asiasia ai nofoaga o lo o gaosia ai meataumafa.

O le Vaega 6 o lo o aiaia ai faasalaga mo solitulafono eseese e aafia ai tulaga o meataumafa.

O le Vaega 7 o lo o aiaia ai le mafai ona faaaogaina o ni meataumafa faaletonu ua mafai ona aoina mai e avea ma molimau i se suesuega faalefaamasinoga.

Ma le Vaega 8 o lo o aiaia ai le puipuiga o le Minisita ma le aufaigaluega i le faatinoga o le latou galuega, o lo o tuuina atu ai foi le 12 masina talu ona faamamafa le Tulafono i le aufaipisinisi e tapena ai ona faatoa faatino ai lea o ni faasalaga o lo o faamoemoeina. O lo o aiaia ai foi i le Vaega e 8 tulaga o consequential amendments po o le fesuaiga lea o nisi Tulafono o lo o aafia ai i totonu o le fesuaiga o lenei Tulafono po o suiga talafeagai o le Tulafono o Taumafa ma Vailaau 1967. E maea ona aveese mai ai tulaga uma i mea tau taumafa ona tuua loa lea o le Tulafono o Vailaau 1967, aua o le a pau ai ia o vaega o le a totoe i lea Tulafono. O le uiga o lea faaupuga, a uma ona aveese mai vaega o lo o i totonu o le Tulafono tuai lea 1967, a o vaega o lo o totoe ai, e agai tonu lea i vailaau, o le a avea lena ma Tulafono o Vailaau. O le a tatau foi ona i ai suiga i le Tulafono o Laisene Tau Pisinisi, po o le Business Licenses Act 1988, ina ia ogatusa ai ma lenei Tulafono Tau Faaofi fou. O nisi Tulafono o le a manaomia le i ai o ni suiga talafeagai ona o lenei Tulafono Tau Faaofi e i ai le Consumer Information Act 1989 po o Tulafono o Faamatalaga Tau i Oloa o lo o Faaaogaina e Tagata o le Atunuu 1989, e faapea foi le aafia ai o le Tulafono o le Ministry of Health Act 2006, le Tulafono a le Matagaluega o le Soifua Maloloina 2006 faapea foi le Tulafono o Nakoti 1967 po o le Narcotics Act 1967 ma faapea foi ma le Poisons Act 1968 po o le Tulafono o Mea Oona 1968.

Lau Afioga, o se faapuupuuga lena o le tulaga o lenei Tulafono Tau Faaofi ma vaega o lo o tagofia ai e tusa ai ma manaoga o lo o ua i ai nei le faagasologa o le soifuaga i mea tau taumafa i le atunuu. Ma lou faaaloalo lava.

FOFOGA FETALAI: Malo faafetai, faafetai i le saunoaga faamalamalama a lau Afioga i le Minisita mo le Soifua Maloloina. Ia, e maitau atu e le o i ai se sui usufono ona ua malamalama ma manino le folasaga a le Afioga i le Minisita. E faapea lava au ua outou malamalama uma i le folasaga a le Minisita.

Tulai mai lau Afioga i le sui usufono mo Faasaleleaga Nu.2.

Susuga PAPANII FAAVAIVAIOMANU TAEU MASIPAU (Faasaleleaga Nu.2): Faafetai i lau Afioga i le Fofoga Fetalai mo le avanoa. E ao foi ona avatu le agaga faafetai i le Afioga i le Minisita mo le faatulai mai foi o lenei Tulafono Tau Faaofi aoga.

Atonu o lea ua maitau atu o lea ua tuueseeseina le Tulafono o Mea Taumafa ma Vailaau. Atonu o se laasaga taua foi lea ua oo i ai mo le faagasologa o tatou Tulafono. Ma ou te talitonu foi o se Tulafono Tau Faaofi aoga mo le atunuu aemaise foi o lenei vaitaimi i le tele o meataumafa ua faaoo mai i le atunuu ma pisinisi o meataumafa i lenei vaitaimi. Malo faafetai i lau Afioga i le Minisita mo lenei Tulafono Tau Faaofi, e fai si tele o lenei Tulafono Tau Faaofi. Ae na o sau faafesili, pe o gafatia e le tatou Tulafono Tau Faaofi lea ona puipua meataumafa foi nei e ono lamatia ai foi le soifua maloloina.

Mo se faataitaiga o mea o eleni foi nei e masani ona avatu ai faasalalaua a le... Faafetai i le Faauluuluga o le Matagaluega i le mataala foi i lea tulaga. A o le agaga o le faafesili, po ua i ai i totonu o le tatou Tulafono Tau Faaofi lea se malosiaga ina ia aua ne i oo mai i totonu o le atunuu ni tulaga faapea, aua e leaga le toe faasilasila mai a o la e ua i totonu o lafanua o le atunuu. Pe i ai se tulaga faapena ina ia puipua ai nei meataumafa aua le oo mai i totonu o le

atunuu. E le gata foi i apa eleni se i vaeatu le Maota ma le faafofoga mai a le atunuu, a o nisi taumafa e ono afaina ai le soifua o le atunuu. I le vaai i ai, atonu o lea ua vaai atu e mafafafa ma tele le Tulafono Tau Faaofi, po o agavaa ai tulaga uma aua le fofoga taumafa ma le soifua maloloina o le mamalu o le atunuu.

O vaega ia e fia fesili atu ai i lau Afioga i le Minisita. Faafetai i lau Afioga i le Fofoga Fetalai.

FOFOGA FETALAI: Malie lau Afioga i le Minisita se i faasolo atu sui usufono mamalu o lo o fia saunoa i le Tulafono Tau Faaofi.

Tulai mai le sui usufono mamalu mo Aana Alofi Nu.3 ona sosoo ai lea ma le sui usufono mo Faleata Sisifo.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa. E avatu foi le agaga faafetai i lau Afioga i le Minisita ona e maitaulia le lava tapena o lenei Tulafono Tau Faaofi i vaega uma e toe faaleleia ai le fofoga taumafa aemaise le tapenaina o fofoga taumafa i totonu o le tatou atunuu.

Na pau lava nai vaega lau Afioga i le Fofoga Fetalai e tauala atu ai ni nai fesili, atonu ua lava tapena totonu o le Tulafono Tau Faaofi, ae pau si vaega lea e faale o maua lelei i lau faitau atu i ai, o lea ua lava tapena uma i le tele o vaega o le mport ina ma le faaaogaina i totonu o le tatou atunuu o meataumafa, a o le store ina i totonu aemaise lava i vaega foi nei o butchery po o faleoloa ona e i ai foi le talitonuga lau Afioga i le Fofoga Fetalai, e i ai nisi o oloa foi nei a tuu i tafatafa o nisi oloa, e i ai le afaina e ono contaminate ai. E le gata foi i lea o nisi foi o faatau, a e tagai i ai, o le tele lava o taimi e lau ai e latou faatau foi ia, e tatau foi i lou talitonuga lau Afioga i le Fofoga Fetalai, e tatau foi ona i ai se malamalamaaga o i latou i faatau, ina ia aua ne i tuufaatasia nisi o meaai po o meataumafa i totonu o tagapepa ona e afaina ai le soifua maloloina.

Na pau lea o se vaega e fesoasoani atu ai lau Afioga ae faafetai i le Afioga i le Minisita ma le Matagaluega mo le Tulafono Tau Faaofi.

FOFOGA FETALAI: Malo. Tulai mai le sui usufono mo Faleata Sisifo.

Tofa LEALAILEPULE RIMONI AIAFI: Faafetai mo le avanoa. E puupuu foi se manatu. Faafetai i le Afioga i le Minisita ma le Matagaluega i lenei Tulafono Tau Faaofi. Ou te talitonu e pei ona e saunoa, ua loaloa aso o taliga i le Tulafono Tau Faaofi, ae faafetai o lea ua saunoa mai ua lava tapena foi i le tele o vaega taitasi. Ua uma foi ona laulau mai kamupani po o tagata mai fafo, sa ou faapea sa tusi lava e lau Afioga ma lau Matagaluega. Ua toe faaleaga lava lau saunoaga i le lau mai fua o lea kamupani, ae o lea sa ou mitamita faapea o le Minisita ma lana Matagaluega sa tusia le Tulafono Tau Faaofi.

Ae o nai motugaafa i nai faleoloa ia e faia faleaiga, aua o pisinisi foi nei e tai tausaga ma maua le latou certificate foi lea o le business license. Po o i ai i le vaega o le Tulafono i luma o faleaiga nei pe a e alu atu e taumafa a o i ai se latou certificate foi lea se approved certificate mai le Matagaluega o lea e lelei atoatoa i tausaga taitasi, ia faigofie ai foi latou galuega ma faigofie ai foi i tagata aai ona mautinoa le lelei tapena mai lea faleaiga i lea faleaiga. E le

gata foi i lea, a o nai aiga tua lea e gaosia ai mea ia pei o ice cake ma taro chips la e fai lava e latou. Po o i ai se aiaiga foi lea e mautinoa ai le saogalemu. E moni o lea e taumafai nei tagata i pisinisi, ae tatau foi ona tagai i ai lau Matagaluega, aemaise lava i mea nei e faatau i totonu o aoga. Aua o lea ua tatou talitonu o le tele lava o faamai lea e pepese ai lau Matagaluega, e mafua lava o le meaai. Sa i ai le manatu ia faalatele atu le Tulafono ia taaofai ai ma meaai ia e faatau i totonu o aoga, aua e taua tele i nai a tatou fanau, e aoao mai i ina le taumafa i mea lelei ma inu le vai auli, e tutupu ae foi e malolosi ma saogalemu ma le poia gofie i mai, pe a faapea e oo i ai. Ae faafetai pe a faapea ua i ai se manatu mo le agai i luma.

O lea sa taua e nisi o sui usufono mea ia mai fafo, aua o le certificate lea o le importation, e pei lava o lo o fai e le vaega lea o le Matagaluega a le MCIL. Pe leai la se vaega foi lea e galulue faatasi ai outou, ina ia mautinoa aemaise lava i mea tau fofoga taumafa o i ai ma le approval a le tou Matagaluega, ae le aumaia i totonu mea nei. O le mea lea e faaigoa nei e tagata eleni nei, e ese lava le eleni e ai, ese le eleni fai faalavelave. O le mea la, pe o le mea na o le fai ai o faalavelave ae le ai ai? Ia, o le mea lea e tatau ona tagai i ai, ua matua tele le faaletonu, e le gata o eleni, o pisupo. O lea ua tatou vaai nei i ai, o le matua tele o le faaletonu i le quality o meaai lea ua lau mai, e sili ai le taofi tatou toe foi e ai mea ia e maua i o tatou laufanua, e faamalosia e sili atu ai lena, i lo le tatala faasoloatoa ae oo mai ai vaega nei.

E le gata i lea, e i ai sala ia e faasala mai i totonu o le Tulafono Tau Faaofi, e pei e malosi le sala foi lea units, lea e sau e tai 5,000 units, tai 10,000. O lona uiga la a faaliliu tupe, e tai afa miliona. O lea e ok, e talafeagai pe a faapea o solitulafono nei, ae peiseai e le o ogatusa ma faasalaga faafalepuipui ona o lea e pei e maualalo tele i lau lea vaai, po o gafea o le mea lea e fai e le Tulafono i tai e lelei, ae pei o lea ou te vaai atu e mamafa tele sala tupe, ne i te i ua fai pea e tagata, ae vaai atu – aua a ta falepuipui pe na o le tasi le tausaga pe le ova i le lua tausaga, i lo le totogi o lena tupe tele e afa miliona lena e fai mai ai aua e mafai ona faasala faapena, ae mafai ona faasao mai e lau Afioga po o le a le tulaga.

O le isi mea, o le vaega muamua o le Tulafono Tau Faaofi, o lea e sau ai le upu faapea – safety food, o le meaai saogalemu ma le meaai talafeagai, e pei o lea e tuu eseese. O lea la ou te fia fesili ai i lau Afioga, po o le a tonu le eseese o nei mea, o le safety food ma le meaai talafeagai. E faapea lava ita a saogalemu loa le meaai ua talafeagai foi. Po o le a le eseese se i faamalamalama mai e lau Afioga, po o le a le mea e tau o le safe food a o le a le mea e tau o le suitable food. O le meaai saogalemu ma le meaai talafeagai po o meaai ia tatou te aai ai e talafeagai ae le saogalemu, po o meaai ia tatou te aai ai e saogalemu ae le talafeagai. E tatau ona faamanino mai e lau Afioga i le alii Fomai ina ia mafai ona tatou tausi ai i le soifua maloloina. Faafetai i lau Afioga i le Fofoga Fetalai.

FOFOGA FETALAI: Malo saunoa. Faafetai matimati ma fautua i le Tulafono Tau Faaofi a le Afioga i le Minisita o le Soifua Maloloina. Ua maea sui usufono mamalu, tulai mai lau Afioga i le Minisita e tali faamalamalama. Malie lava lau Afioga i le Minisita, se i avatu lava le avanoa mulimuli lea i le Afioga i le Tuiatua Faanofonofo. Tulai mai le sui usufono mo Aleipata Itupa i Lalo.

Afioga TAFUA MALUELUE TAFUA (Aleipata Itupa i Lalo): Lau Afioga i le Fofoga Fetalai, i lalo o le Vaega o le Tulafono Tau Faaofi, faafetai lava. E muamua ona momoli atu le agaga faafetai ma le faamalo i lau Afioga i le Minisita faapea foi le Matagaluega i lenei Tulafono Tau Faaofi o Taumafa 2013. E taua tele le faatonutonu o le tagofia o taumafa, pisinisi o taumafa ma aiaiga, ma suesuega lelei o taumafa faapea foi ma galuega tauave ma tiute o i latou e tusa ai ma le Tulafono Tau Faaofi.

Na pau lava le manatu ua ou tulai atu ma le faaaloalo lau Afioga i le Fofoga Fetalai, o le Fuaiupu 12, o le asiasia lea o tatou taumafa foi nei mai fafo. O lea lava e maitau e le o mamao tele atu foi se taimi sa lipoti mai ai nisi o pusa eleni ia e aumai e faaletonu. O lona lua o lea e manino foi le Tulafono Tau Faaofi, e momoli atu ai le agaga faafetai ma le faamalo i le Afioga i le Minisita ma le Matagaluega. E matua taua tele le Fuaiupu 12 lea mo le asiasia o taumafa mai fafo. O le Fuaiupu 3 o le Tulafono Tau Faaofi o lo o manino mai ai foi le Certificate of Health. Ia e le gata i lea, ae faapea foi ma i latou o le Fuaiupu 14, o i latou e tagofia taumafa pe fai a latou pisinisi taumafa. O lea e i ai le vaega lea e i lalo o le Fuaiupu 15, o i latou lea e faapea operators to ensure that food can be traced. O i latou e i ai latou pisinisi, po o faleaiga e mautinoa e mafai ona toe tuliloaina le mea e agai i ai le taumafa.

O le agaga la o lou tulai atu ma le faaaloalo, po o i ai se aiaiga ma tulaga e tuliloaina ai le vaega foi lea e faatau manupapalagi, aua o nisi o manupapalagi e maua mai i faalavelave ma mea faapea, o lea lava e agai i faleoloa lea e fai a latou taumafataga. O le fesili la o lea e maitau atu i le Tulafono Tau Faaofi, e le o i ai se aiaiga e tuliloa ai i latou ia, aua o le faatusa a faapea e faatau se manupapalagi i se faleaiga, po o i ai se aiaiga foi lea e faamaumau i latou na faatauina le manupapalagi i lea faleaiga, faatatau a faaletonu le manupapalagi pe mamai mai ai nisi i lea faleaiga, e tuliloaina i latou ia sa faatauina le manupapalagi i lea faleoloa.

O le Fuaiupu 16 lau Afioga ma le faaaloalo, o lea e manino mai lava i latou o food handlers po o i latou e tauaaoina taumafa, lea foi e i ai ma le vaega 2 e siakiina i latou e tagofia le taumafa.

O le fesili la ma le faaaloalo; pe o ai e monitor ina ma tuliloaina le vaega lea pe afai e gasegase se tasi e tagofia le taumafa, ma ono aafia ai e o le a taumamafa i ia taumafa ua tapenaina. Aua o lona uiga o lea e mamafa le sala, ae pei o le tuliloaina lava o le saogalemu. O tatou e faamoemoe malosi lo tatou tamaoaiga i le vaega lea o tagata tafafao maimoa mai fafo. E le gata foi i lea, e faamoemoe tele a tatou pisinisi aemaise i latou e fai faleaiga i o tatou lava tagata, le au consumers locally, tagata lava ia o tatou e taumamafa i faleaiga nei. Sa ou tuualalo foi i le Fonotaga ua mavae atu i le tulaga lava lea o i latou ia e faia faleaiga ma pisinisi, e pei o atunuu ia i fafo e i ai lava a latou mea foi nei e categories ai faleaiga, o le A, o le E ma le I. O lona uiga a A o le top glass le faleaiga lea. O le E e feoloolo, o le I, ua i ai foi si tau faaletonu laitiiti ae o la e lelei lava e ono taumamafa ai le atunuu. Aua o le vaega lea a mafai ona tatou faapea, ia e faigofie lava a aumai ni au malo mai fafo e te alu ave i le faleaiga o la e te silafia lelei ma e malamalama ai, o le Category A le faleaiga lea. A o tatou, o le Category A, masalo na o le aumaumea lava e o i ai aua e taugata. Ae lelei foi le taugata ae mautinoa e le mai ai, aua o isi lava Category A lea e i ai i atunuu i fafo, na o le faaupuga lava ia e aumai le fasipepa, ae alu atu e gasegase ai lava.

O le tuualalo lea ma le agaga faaaloalo i lau Afioga i le Minisita, ae malo lava faafetai, manaia le Tulafono Tau Faaofi. Ia manuia le Fono.

FOFOGA FETALAI: Malo faafetai. Malie le Minisita mo le Soifua Maloloina se i tuu atu le avanoa i le Afioga i le Minisita mo Faatoaga ma Faigafaiva.

Tulai mai lau Afioga i le Minisita.

Afioga Hon Le Mamea Ropati (Minisita mo Faatoaga ma Faigafaiva): Faafetai i lau Afioga i le Fofoga Fetalai. Mo le faasaoina ma le fia fesoasoani atu foi i lou uso a Minisita, o le mataupu lea sa taua i le saunoaga a le Afioga i le sui usufono mamalu faatoa maea atu nei le sui usufono mo Aleipata Itupa i Lalo, e uiga lea i le tino o manupapalagi. O lo o faamoemoe le Matagaluega o Faatoaga e tuuina mai le latou Tulafono Tau Faaofi mo le Slaughter Houses i luma o le Palemene i se taimi o lo o lumanai, ona faamanino mai ai lea o le tulaga lea, o lo o galulue faatasi ai ma le Matagaluega mo le Soifua Maloloina, aemaise le Tulafono Tau Faaofi lea ua saunoa nei i ai le Afioga i le Minisita. A tuuina mai, atonu o le a malamalama tele ai. O lau faaopoopo atu lea ma lou agaga faaaloalo.

FOFOGA FETALAI: Malo faafetai fesoasoani mai i lau Afioga i le Minisita mo Faatoaga ma Faigafaiva.

Tulai maia lau Afioga i le Minisita mo le Soifua Maloloina e talifuaitau i finagalo na laga e sui usufono.

Afioga Hon TUITAMA TALALELEI TUITAMA: Malo faafetai i le mamalu o sui usufono sa faaalua ma fesiligia foi lenei Tulafono Tau Faaofi. Ma e maitau atu, ai ona ua vave tele ona oo mai le Tulafono Tau Faaofi ae le i faitau i ai sui usufono. O le tulaga lea e maitau atu i le tatou Fonotaga i le aso, o lea e peiseai ua mananao sui usufono ou te faitauina le Tulafono Tau Faaofi ma tau atu i ai tali la e i totonu o le Tulafono Tau Faaofi. A silasila lelei i ai i le tatou Tulafono Tau Faaofi, o fesili uma lava ia na aumai lau Afioga, o lea e i totonu uma tali i totonu o le Tulafono Tau Faaofi, e leai lava ma se fesili e fou pee se mai nai lo mea ia e i totonu o le Tulafono Tau Faaofi. O le mea lea e fautuaina e sa fesili, ia faitau faalelei le tatou Tulafono Tau Faaofi ona outou malamalama ai lea o lena e i ai i ina tali o a outou fesili mo le faataitaiga.

O le sui usufono mo Faasaleleaga Nu.2 lea sa fesiligia le tulaga lea tau le puipuiga foi lele i le agavaa ma le mafai e puipui ai, ia silasila i le vaega e lua, ia o le Fuaiupu 5, 6, 11 ma le 12, o lena e i ai tali o lau fesili.

O le Afioga i le sui usufono mo Aana Alofi Nu. 3, o le tulaga sa faafesiligia, o le tali o lo o i le vaega e tolu Fuaiupu 13 ma le 16. O le tulaga i le fesili a le Afioga i le sui usufono mo Faleata Sisifo, ia e mafai ona ou faapea atu o lena foi e i totonu o le tatou Tulafono ia le tali o lau vaega lena. O le mulimulitaiina o le galulue faatasi o le MCIL ma le Matagaluega o le Soifua Maloloina i le aumaiga o oloa i totonu o le atunuu, o le galuega lea e fai faatasi a le MCIL ina ia mautinoa e ogatusa ma Tulafono e pei ona ou faalauiloa atu o le CODEX Alimentarius lea o lo o limataitaiina ai atunuu taitasi, ia mo le tulaga lea i feaatauaiga mai totonu e aofia ai la ma meataumafa.

O le vaega foi la lea, a o lei faatauina se meataumafa e tatau ona i ai muamua ia le pasia e le Matagaluega o le Soifua Maloloina, ona faatoa mafai lea ona faataga ia lena meataumafa mo le faatauina atu, e le mafai foi la ona...a faapea foi la e pei ona fesiligia pe ua i ai se vaega o se meaai ua masalomia ua faatau mai ua faatupu ai se gasegase ma afaina ai se isi, o le Tulafono lea o lo o i aiaiga o le Tulafono e te faamauina o lē e ona le pisinisi po lē na te faatau maia taumafa e na te faamauina le suafa o lē na faatau mai ai ma le aso na faatau mai ai. Ia a oo la ina fesiligia le meataumafa lea i aiaiga la lea o le Tulafono, ia mafai e lē e ona le pisinisi ona tulimatai le tagata na aumai ai le mea lea ma faapea mai, o, o lau povi lea e faaletonu na aumai i le sui usufono mo Faleata Sisifo ae o le faiga lava na o povi e le lelei, ia e faigofie ona tuli faapena. O lea e i ai i totonu o le Tulafono aiaiga na, a faapea foi la e manaomia se meataumafa ina ia mautinoa e le o faia se faatogafiti ona afaina se isi e aunoa ma ni faamaoniga tatau, a lea pei ona ou faitauina atu, e mafai e le Matagaluega ona aumai le vaega lea o le meataumafa lea ua fesiligia e avea ma molimau i se moliaga e fai i le faamasinoga e mautinoa ai, o le vaega lava lea na aumaia ae le o se vaega o se meaai na e alu aumai i se isi mea ma tauvlea ai lē sa e faatau mai ai ia le meatausami.

FOFOGA FETALAI: Malie lau Afioga i le Minisita leaga o lea sa taua le tuaia o le povi lea, po o se povi a le WSTEC po o se povi a Vaitele....

Tofa Lealailepule Rimoni Aiafi: Leai e le afaina. O mea ia na avatu i fautuaga a lena vaega, o le fai lea o se fuafuaga e taofi ai mea ia e lei oo mai, aua o le tele o mea ia seiloga e oo mai iinei expect atu vaai e leaga faatoa tuu, pei o le mea lena o le fautuaga lea na avatu i le Afioga, aua e tatau la ona aumai ni sample muamua e test iinei e tatou, aua e mafai ona maitau apa eleni o la e aumai ai produce in South America, na o le pau lena o le mea lea e sau ai ae le iloa po o fea le atunuu e fai ai, o lena e silafia e le Afioga i le Minisita, po o le mea na o le avatu lava o le povi, I am not a farmer.

FOFOGA FETALAI: Malo. Tulai mai le sui usufono mamalu lau Afioga i le Minisita.

Afioga Hon TUITAMA TALALELEI TUITAMA: E talitonu o lena ua uma ona saunoa le Afioga i le Minisita mo Faatoaga, ia pei lava ona fesiligia le tulaga lea i mea tau manu foi ia ona o lo o fesiligia tulaga ia e tusa o le matafaioi lea o le Ofisa o Faatoaga o le mautinoa saogalemu manuia. O lo o i ai fale lea ua i ai nei pei o le Lucky isi pisinisi ia ou te iloa nei, e le mafai ona latou faatauina se manifasi sei vagana ua uma ona pasia muamua e le fomai e mautinoa o lo o saogalemu, ona faatoa mafai lea ona latou faatauina le manu lea ia ma faaogaina mo le faatauina atu i tagata o le atunuu.

E pei na o le pau lena lau Afioga ia manuia le Fono.

FOFOGA FETALAI: Ia malo faafetai tali malamalama i lau Afioga i le Minisita, e manatu foi ua matua fefefe sui usufono mamalu e toe fesili a e tali e te tali maeaea e tai fa vaiaso o tali.

Na faamaonia le lafo ma faitauina le Tulafono Tau Faaofi o Taumafa 2013 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o le Soifua Maloloina, Galuega tau Va Fealoai, Mataupu tau Lotoifale, Atinae o Afioga ma Agafesootai mo le iloiloina ma toe lipoti mai i le Fono Aoao i se Fonotaga o lumanai.

**TULAFONO TAU FAAOFI O AUAUNAGA LAGOLAGO
FAA-SOIFUA MALOLOINA 2013 – faitauga muamua**

FOFOGA FETALAI: Tulai mai lau Afioga i le Minisita mo le Soifua Maloloina.

Afioga Hon TUITAMA TALALELEI TUITAMA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Auaunaga Lagolago Faa-Soifua Maloloina 2013 i lona faitauga muamua.*

Faaluaina e le Minisita mo Fesootaiga ma Faamatalaga Tekonolosi, Minisita mo Tupe Maua, ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo lona faitauga faalua i le aso fono lona 3 e mulimuli mai.

**TULAFONO TAU FAAOFI O LE FAALAPOTOPOTOGA FAAVAE E
UUNAIA LE SOIFUA MALOLOINA LAUTELE 2013
– faitauga muamua**

FOFOGA FETALAI: Tulai mai lau Afioga i le Minisita mo le Soifua Maloloina.

Afioga Hon TUITAMA TALALELEI TUITAMA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faalapotopotoga Faavae e Uunaia le Soifua Maloloina Lautele 2013 i lona faitauga muamua.*

Faaluaina e le Minisita mo Galuega, Felauaiga ma Atinae Eseese, Minisita mo Faatoaga ma Faigafaiva, ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo lona faitauga faalua i le aso fono lona 3 e mulimuli mai.

**TULAFONO TAU FAAOFI O TEUTEUGA O LE TULAFONO O
ELEELE, FUAGAFANUA MA LE SIOSIOMAGA 2013
– faitauga muamua**

FOFOGA FETALAI: I le toesea ai o le Minisita mo Eleele ma Fuagafanua, ou te tapa le Afioga i le Palemia e tulai mai.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, i le toesea ai o le Minisita mo Eleele ma Fuagafanua, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Eleele, Fuagafanua ma le Siosiomaga 2013 i lona faitauga muamua.*

Faaluaina e le Sui Palemia, le Minisita mo Fesootaiga ma Faamatalaga Tekonolosi, ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo lona faitauga faalua i le aso fono lona 3 e mulimuli mai.

**TULAFONO TAU FAAOFI O TEUTEUGA O LE TULAFONO O
SOLIGATULAFONO TAU LEOLEO 2013 – faitauga muamua**

FOFOGA FETALAI: Tulai mai lau Afioga i le Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei.

Afioga Hon SALA FATA LISATI PINATI (Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Soligatulafono tau Leoleo 2013 i lona faitauga muamua.*

Faaluaina e le Minisita mo Galuega, Felauaiga ma Atinae Eseese, le Minisita mo Aoga, Taaloga ma Aganuu ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo lona faitauga faalua i le aso fono lona 3 e mulimuli mai.

TULAFONO TAU FAAOFI O TEUTEUGA O LE TULAFONO O FOMAI 2013 – faitauga muamua

FOFOGA FETALAI: Tulai mai lau Afioga i le Minisita mo le Soifua Maloloina.

Afioga Hon TUITAMA TALALELEI TUITAMA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fomai 2013 i lona faitauga muamua.*

Faaluaina e le Minisita mo Faatoaga ma Faigafaiva ma le Minisita mo Aoga, Taaloga ma Aganuu.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo lona faitauga faalua i le aso fono lona 3 e mulimuli mai.

ILOILOGA O LIPOTI A KOMITI FILIFILIA

P.P. 2012/2013 NU. 32, LIPOTI A LE KOMITI O OLOA GAOSIA TULAGA MUAMUA, MATAUPU TAU PISINISI, ALAMANUIA MA LEIPA I LE P.P. 2011/2012 NU. 102, LIPOTI FAALETAUSAGA A LE PULEGA O TAGATA TAFAFAO MAIMOA MO LE TAUSAGA FAALETUPE FAAIUINA ASO 30 IUNI 2010 – Iloiloga

FOFOGA FETALAI: E tolopo Galuega a le Fono Aoao Faitulafono i le aso fono 6 Aokuso 2013 ua maea ona faitau Fautuaga ma Iugafono a le Taitaifono.

O le taimi nei, ia e manatu ua fai sina umi o le faitauga o lenei Tulafono, ae o le a lafo atu pea le avanoa i se isi sui usufono o lo o fia saunoa e ala i lenei Lipoti e tuu atu pea le avanoa, a leai o le a tuu atu loa le tatou fesili.

Na faamaonia le Lipoti.

FOFOGA FETALAI: E tusa ai ma le Tulafono Tumau 54, e ao i le Malo ona tuuina mai i le Fono Aoao se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

**P.P.2012/2013 NU.33, LIPOTI A LE KOMITI O TUPE MAUA MA
TUPE TOTOGI I LE P.P.2011/2012 NU.30, FAAMATALAGA O TALA
O TUPE A LE PULEGA O PETIPETIGA MO LE TAUSAGA
FAAIUINA ASO 30 IUNI 2010 – Iloiloga**

FOFOGA FETALAI: Tulai mai lau Afioga i le Taitaifono o le Komiti o Tupe Maua ma Tupe Totogi.

Susuga Hon PAPALIITELE NIKO LEE HANG (Taitaifono o le Komiti o Tupe Maua ma Tupe Totogi): Lau Afioga i le Fofoga Fetalai ma le faaaloalo ou te faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

Faaluaina e se tasi o sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow ma le sui usufono mo Aleipata Itupa i Lalo.

FOFOGA FETALAI: Tulai mai lau Afioga i le Taitaifono.

Susuga Hon PAPALIITELE NIKO LEE HANG: Lau Afioga i le Fofoga Fetalai;

“SAILIILIGA.

O le Faalapotopotoga o Pulega o Petipetiga a Samoa (TAB) sa faavaeina i lalo o le Tulafono o Petipetiga 1990. O le sini autu po o matafaioi patino a le Pulega o Petipetiga e aofia ai :-

- (i) *le faatinoina po o le tuuina atu lea o petipetiga e tusa ai ma Tulafono o Masini o e faamaumau ai peti taitasi e tusa ai ma taaloga petipeti i totonu o le atunuu po o fafo atu o Samoa po o se maliega sa faia i lalo o le Vaega 17 o le Tulafono Autu,*
- (ii) *le faaauauina pea o le pisinisi tau petipetiga ma faatino taaloga o le Lotto i totonu o Samoa ma ia saunia ni fale po o ni ofisa e mafai ai e tagata oma taaalo i taaloga Loto i totonu po o fafo atu o Samoa.*

Ua matauina e le Komiti e tusa ai ma le Lipoti Faaletausaga ma Faamatalaga Tau Tupe a le Pulega ua lata nei i le 20 tausaga talu ona faavae mai le Pulega o Petipetiga. E tusa ai ma faamaumauga, o le masina o Me 2005 na amatalia ai ona mata'ituina e le Pulega o Petipetiga faatasi ai ma le lagoon a le Kamupani Lotto a Ausetalia e taua o le TMS Global Services, ona faagaioi ma mata'itu le faatinoina o taaloga tau petipetiga i lalo o le faamalumaluga a le Pulega a le Kamupani o le Samoa Sportslotto e o' mai i le taimi nei.

Ua matauina e le Komiti, mai le amataga i le faavaeina mai o lenei Pulega, sa mafai ona faamatuu atu se vaega o ana tupe maua e fesoasoani ai mo le atinaeina o taaloga eseese i totonu o le atunuu. Aepeitai, ua matauina e pei ona lipotia mai i lenei Lipoti, sa faamauina ai nisi o fesoasoani tau seleni sa tuuina atu e le Pulega po

o le Komiti Faatino mo nisi o Faalapotopotoga Tumaoti ma nisi o aoga i totonu o le atunuu.

O nei foai tau seleni sa tauaao atu e le Pulega e aofia ai se vaegatupe e \$20,000 sa foai atu mo le Faalapotopotoga Faamamā-toto a Samoa(NKF) i Motootua, \$5,000 mo le Aoga Loto Taumafai, \$3,414 sa foai atu mo le aoga Tulagalua a Leauvaa, ma nisi o foai mo Ekalesia ma tagatanuu taitoatasi sa aafia i faalavelave po o ni gasegase na aafia ai le atunuu lautele i lea vaitaimi.

FAAFETAI:

E faamauina le agaga faafetai ma le faamalo a le Komiti ona ua maitauina i tausaga ua tuanai le telē o le sao o le Pulega o Petipetiga e tauala i ana fesoasoani tau tupe sa ofoina e lē gata mo atinae tau taaloga, ae ua faapea foi ona aafia ai ma isi Faalapotopotoga ma tagata taitoatasi i totonu o le atunuu.

FAUTUAGA:

I le maea ai o Iloiloga a le Komiti na faaiugafonoina ai e fautuaina le Malo:-

- 1. Ina ia tuuina mai i Lipoti Faaletausaga i le lumanai faatasi ai ma Faamatalaga Tau Tupe a le Komiti Faafae o Petipetiga, Galuega Faatino ma Polokalame sa faatinoina ma ausia e le Komiti Faafae i le Tausaga Faaletupe e faasino i ai;**
- 2. Ina ia mata'itu pea e le Pulega ma le Komiti Faafae o Petipetiga nisi auala mo le faafaigaluegaina ai o tupe a le Pulega mo nisi tupe faasili aua le siitia ai ma le faaleleia o atinae tau taaloga i totonu o le atunuu;**
- 3. Ina ia toe silasila toto'a le Pulega ma le Komiti Faafae i le faamatuuina atu lea o fesoasoani tau seleni i le atunuu lautele, ina ia ave pea le faamuamua i atinae tau taaloga e pei o le sini autu na faavaeina ai le Komiti Faafae o Petipetiga.**

IUGAFONO:

I le maea ai o Iloiloga a le Komiti e fautuaina le Fono Aoao,

Ina ia faamaonia le P.P.2011/2012 Nu.30, Faamatalaga o Tala o le Tupe a le Pulega o Petipetiga mo le Tausaga Faaletupe Faaiuina aso 30 Iuni 2010."

Faafetai.

FOFOGA FETALAI: Malo faafetai saunoa faamalamalama i lau Afioga i le Taitaifono o Tupe Maua ma Tupe Totogi.

Ia o le avanoa lenei o se sui usufono e fia saunoa i le tatou Lipoti. A faapea e leai, o le a tuuina atu le Fesili.

Na faamaonia le Lipoti.

FOFOGA FETALAI: E tusa ai ma le Tulafono Tumau 54, e ao i le Malo ona tuuina mai i le Fono Aoao se Pepa e tali atu ai i Fautuaga ua tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia i le Fono Aoao le Lipoti.

P.P.2012/2013 NU.34, LIPOTI A LE KOMITI O MATAUPU TAU FAAMASINOGA, LEOLEO MA FALEPUIPUI MA FAAMASINOGA O FANUA MA SUAFA I LE P.P.2011/2012 NU.4, LIPOTI FAALETAUSAGA A LE MATAGALUEGA O FAAMASINOGA MA PULEGA TAU FAAMASINOGA MO LE TAUSAGA FAALETUPE FAAIUINA ASO 30 IUNI 2009 MA LE P.P.2011/2012 NU.38, LIPOTI FAALETAUSAGA A LE MATAGALUEGA O FAAMASINOGA MA PULEGA TAU FAAMASINOGA MO LE TAUSAGA FAALETUPE FAAIUINA ASO 30 IUNI 2010 - Iloiloga

FOFOGA FETALAI: Tulai mai lau Afioga i le Taitaifono o le Komiti o Mataupu Tau Faamasinoga, Leoleo ma Falepuipui ma Faamasinoga o Fanua ma Suafa.

O lea e maitau atu ua tatou le au faatasi ma le Taitaifono, ae tulai mai lau Afioga i le Sui Taitaifono o le Komiti.

Afioga AFOAFOUVALE JOHN MOORS (Sui Taitaifono Komiti o Mataupu Tau Faamasinoga, Leoleo ma Falepuipui ma Faamasinoga o Fanua ma Suafa): Lau Afioga i le Fofoga Fetalai, ona o le toesea o le Taitaifono o le Komiti mamalu, o lea ou te tulai atu ai ma le faaaloalo lava ou te faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

Ma lou faaaloalo lava.

Faaluaina e le sui usufono mo Falelatai ma Samatau ma le sui usufono mo Aiga i le Tai.

FOFOGA FETALAI: Ia, tulai mai lau Afioga i le Sui Taitaifono e faitau Iugafono ma Fautuaga.

Afioga AFOAFOUVALE JOHN MOORS: Lau Afioga i le Fofoga Fetalai;

“SAILIILIGA:

O le Lipoti Faaletausaga a le Matagaluega o Faamasinoga mo Tausaga Faaletupe 2008/2009 ma le Tausaga Faaletupe 2009/2010, o

lo o auiliili atu ai nisi o Polokalame o fuafuaga Alualu Mamao ma Galuega Faatino na mafai ona ausia i totonu o tausagsa faaletupe e pei ona lipotia mai.

O lo o avea pea ma fu'a taualuga a le Matagaluega o Faamsainoga le Faafoeina o Mataupu Tau Faamasinoga e silisili ona lelei i le Itulagi o le Pasefika. E le gata i lea, o le faatinoina o le auaunaga aupito sili ona lelei mo taualumaga uma o Faamasinoga, faatasi ai ma le atinaeina lea o faiga lelei ma le amiotonu aua le nofolelei o le atunuu lautele.

O le tausaga faaletupe 2008/2009 e pei ona lipotia mai, na faaauuina ai le polokalame po o le poloketi mo le toe fuataina ma le faaleleia o le auaunaga (Institutional Strengthening Project) sa feagai ai ma le Matagaluega o Faamasinoga. I le maea ai o leni poloketi i le tausaga faaletupe 2009/2010, na toe fetuunai ai loa le Matagaluega i le maea ai o feutagaina ma le Komisi e Pulea Tagata Faigaluega a le Malo. O le toe faatulagaina o le Matagaluega i ona Vaega Tetele e fitu (7) e aofia ai:

1. **Vaega Fauautua Faaletulafono, Faiga Faavae & Pasiaina o Ata Tifaga,**
2. **Vaega o Faamasinoga o Soligatulafono & Aitalafu,**
3. **Vaega o Faasaoga, Faamalosia o Faaiuga a le Faamasinoga ma le Tausiga o Tina & Fanau,**
4. **Vaega o Faamasinoga o Fanua & Suafa,**
5. **Vaega o Feutagaina ma le Resitaraina o Suafa Matai,**
6. **Vaega o Auaunaga Lautele,**
7. **Vaega o Faamasinoga i Tuasivi.**

Galuega Faatino na mafai ona ausia.

Ua matauina e le Komiti nisi o suiga tetele na mafai ona ausia e le Matagaluega o Faamasinoga i totonu o le Tausaga Faaletupe nei. O nisi o nei suiga tetele na ausia e le Matagaluega e aofia ai le tuufatasia mo le taimi muamua o Vaega uma a le Matagaluega i lana Nofoaga Tutotonu i Mulinuu. O le aso 26 Ianuari 2010 na tatata aloaia ai le nofoaga tutotonu fou mo le Matagaluega o Faamasinoga.

Na taua foi e le Matagaluega nisi o ana polokalame tau le aoaoga sa faatinoina mo le auaunaga e aofia ai aoaoga faaletulafono ma paaga masani a le Matagaluega. O nei polokalame faaleaoaoga a le Matagaluega o Faamasinoga sa faatinoina i lalo o le Polokalame mo le Unaia o Galuega mo le Faaleleia o Auaunaga po o le Institutional Strengthening Programme (ISP). O leni polokalame sa auga tonu mo le faaleleia o nisi o **auaunaga patino** a le Matagaluega e aofia ai:

- **Taiala o Galuega mo Mataupu tau Soligatulafono;**
- **Taiala i le Faaogaina o Faamauga Faavae o Soligatulafono; ma;**

- **Taiala i Malosiaga Faaletulafono o le Resitala.**

Na molimauina e le Matagaluega le taua ma le aoga tele o lenei polokalame e le gata mo le toe fetuunai ai ma le faaleleia o auaunaga a le Matagaluega e ala i le tautuaina o Faamasinoga, ae faapea foi i polokalame tau aoaoga sa faatautaia mo le atinaeina o tomai ma agavaa o le afaigaluega a le Matagaluega.

O le sini autu i le faatautaia ai o polokalame faaleaoaoga o le ISP mo le Matagaluega, sa auga lea mo le ofoina atu o se auaunaga aupito sili ona lelei aua le faafoeina o Tualumaga tau Faamasinoga. O le polokalame leni a le Matagaluega sa faatupeina i lalo o le polokalame fesoasoani ofoina mai e le malo o malo o Niu Sila

ASIASIGA A LE KOMITI – (MULINUU).

Na asia e le Komiti le Ofisa Autu o le Matagaluega o Faamasinoga ma Pulega Tau Faamasinoga i Mulinuu ma matauina ai, e ono(6) Vaega Autu o le Matagaluega o lo o faafoeina lana auaunaga e aofia ai:

VAEGA O AUAUNAGA LAUTELE:

O le Vaega o Auaunaga Lautele e aofia ai le Vaega o Tupe a le Matagaluega, Tagata Faigaluega, Faamaumaga ma Faamatalaga Tekonolosi.

Na faamaonia mai e le Matagaluega, na talosagaina lava le Komisi o le Afaigaluega o Galuega a le Malo (PSC) i le manaomai o tagata faigaluega a o le i siitia atu i lona Ofisa fou ua iai nei. O lea talosaga na toe fausia ai foi ma le faatulagaga o le afaigaluega ina ia amata i lona Ofisa fou a ua mafai ona faatumu avanoa faigaluega manaomia mo le tautuaina o Faamasinoga e tolu. Ae peitai na talia e le Matagaluega o Tupe lea fuafuaga ae o lo o talia pea e le Matagaluega o Faamasinoga le tali mai a le Komisi e Pulea Tagata Faigaluega a le Malo (PSC) i le taimi na tuuina mai ai nei Lipoti Faaletausaga.

FAILA O FAAMAUMAUGA

Na maitauina foi e le Komiti, na o le Ofisa Sili o Pulega/Resitara o Faamasinoga o Fanua & Suafa e iai le faatagana ma le faamaoniga e mafai ai ona faamatuu atu faila o faamaumaga o Faamasinoga o Fanua ma Suafa mo le faaogaina e le atunuu lautele i a latou mataupu. Talu mai le amataga seia oo mai i le tausaga 2003, sa mafai lava ona tuuina atu faamaumaga/faila ma suesuega a le atunuu i lalo o le taitaiga a le tagata o le ofisa. Ae peitai e iai faafitauli ua matauina e le Matagaluega i lea faiga. O nisi taimi e mafai ona tumuli sea alii/tamaitai ofisa i se mataupu a le ofisa mo se taimi puupuu ae

saolotoai lava le mamalu o le atunuu e ana mataupu i faila ua tuuina atu iai. O iina tonu, na matauina e le Matagaluega na saofagā ai le toesea o faamaumauga mai faila o mataupu a aiga ma afioaga e pei ona teuina e le Ofisa o Faamasinoga.

Ona o lea faafitauli, na a'e ai se tofā i le Matagaluega mo le suia o se isi faiga ina ia mautinoa le malupuipua ai o ia faamaumauga ma measina a aiga. O le faiga fou la ua iai nei e pei ona molimauina foi e le Komiti i lana asiasiga, a manaomia se faamaumauga/faila mo se mataupu o lo o faatalatalanoaina, e tatau ona faatumu le pepa faatumu manaomia ma siaki e le Ofisa Sili Lagolago o Pulega o lea Vaega, ona auina atu lea mo le faamaoniaina e le Ofisa Sili o Pulega po o le Resitara o Fanua ma Suafa. A faamaonia mai e le Ofisa Sili o Pulega sea talosaga(pepa faatumu), ona tuuina atu loa lea o le isi pepa faamaonia (transit card) i le alii/tamaitai ofisa ma Lē e and le mataupu mo le faamatuuina mai o le faila mai le Vaega o Faamaumauga. Na maitauina e le Komiti i lana asiasiga, e na o le Ofisa Sili o Pulega e aumai ai le faamaoniga ma le faatagana mo le faamatuuina atu o so o se Faamaumauga/Faila manaomia mo so o se mataupu. E ui foiina faigata i nisi taimi pe a toesea le Ofisa Sili o Pulega mai le Ofisa, ae na maitauina e le Komiti, o se auala aupito sili lea ona lelei ua saunia e le Matagaluega ina ia mautinoa ai le malupuipua o faamaumauga o mataupu a le atunuu lautele.

Na matuaina e le Komiti, ua amata i le taimi nei se galuega tele(poloketi) a le Matagaluega mo l3e tuuina o Faamaumauga o le Faamasinoga o Fanua & Suafa i masini komepiuta (***Digitization of Land and Titles Court Records***). O lea galuega o lo o faatupeina i se fesoasoani tau tupe mai le Malo o Ausetalia mo le tolu(3) tausaga ma e silia i le \$1 miliona na faatupeina ai masini komepiuta e fa(4) ma masini pueata o faamaumauga (scanners) e fa(4). O Iapani na maua ai le fesoasoani mo le polokalameina o masini komepiuta mo lea galuega (software program).

Na taua e le Matagaluega, ua leva ona fuafua mai lea galuega ma sa tau saili foi se fesoasoani tau tupe ona e lē gata ina taugata, ae e lē faatinoina foi i se taimi puupuu aua e faatupulaia pea faila o faamaumauga i masina uma ese mai a ii le 30,000 o faila o lo o iai i le taimi nei. Ua amata la galuega mo Upolu nei ae o lo o iai foi le fuafuaga mo faamaumauga i Savaii ona o le faigata o le feaveaiga o faila. Na taua foi e le Matagaluega, ua maea ona tuuina atu se ***Talosaga a le Matagaluega i le Kapeneta*** mo se fesoasoani tau tupe mo:

- i. ***Ina aofia ai ma le Faamasinoga Sili i lea galuega (poloketi);***
- ii. ***E faaauauina ai lea galuega pe a maea le tolu tausaga o lo o faatupeina ai e le Malo o Ausetalia;***
- iii. ***E faatuina ai se isi Vaega ese mo Faamaumauga.***

O le sini autu o lea taumafaiga, ina ia maua pea faamaumauga o so o se mataupu na tagofia e le Faamasinoga talu mai le amataga. O le popolega foi o le Matagaluega, ina nei tulai mai se faaletonu e ona aafia ai faamaumauga i se malaia(afi), o lona uiga e leai ma se faamaumauga e toe maua i le lumanai. O le tele foi o faamaumauga aemaise lava le vaitausaga o le 1800 – 1900, ua amata ona sautia ma ua tau le manino i le faitau.

I le tuliloaina o tulaga aupito sili ona manaomia mo lea vaega o le auauunaga, ua avea ai o se vaega o ***Faiga Faavae a le Matagaluega*** e faapea:

- i. Na o le Ofisa Sili o Pulega e iai le faamaoniga ma le faatagana o le faamatuuina atu o faila o faamaumauga mo faatalatalanoaga o mataupu a le atunuu pe a manomia:*
- ii. Faatautaia le siakiina o le aufaigaluega aemaise lava i le vaega o Faamaumauga i taimi manava ina ia mautinoa e le o toesea e se tagata faigaluega ia faila o faamaumauga o le Faamasinoga.*

O ***faafitauli*** o lo o feagai ma le Matagaluega i lea faamoemoe, o le lē lava o le aufaigaluega ma le manaomia o le siitia o vaegatupe faatatauina i ana Tala Faatatau o le Tupe i tausaga taitasi e fesoasoani i lona faagaioiga.

VAEGA O FAASAOGA, FAAMALOSIA O FAIUGA A LE FAAMASINOGA & TAUSIGA:

Na matauina e le Komiti o lo o faatinoina pea ni polokalame (Faiga o le elei) mo ie latou o lo o aafia i faasalaga mo le Vaega o Tausiga ma le Faamaoniga o Tama. O nisi o latou o lo o faasala i galuega mo le atunuu lautele(community work), ma e ta'i 100 itula e faatinoina ai lea auauunaga. E tusa ai o faamatalaga na tuuina mai e le Matagaluega, ua faaititia i le taimi nei le fuainumera o i latou oaafia ii a ituaiga mataupu ma o se tulaga lelei tele.

VAEGA O FAIGA FAVAE MA LE TOE ILOILOINA O GALUEGA:

O lea Vaega ua aofia ai ma le Vaega Pasiata (Censor) ma o loo o faauluulu i se Tamaitai Loia. O lea Vaega o le Matagaluega e nafa ma le Tuufaatasia o Lipoti Faaletausaga ma le Fuafuaga Autasi a le Matagaluega, faatautaia o aoaoga (trainings) ma le aoina o faamatalaga ma faamaumauga a Vaega taitasi.

O le Vaega Pasiata o lo o mafai ona galulue faatasi ma le Komiti Faatino Pasiata, Matagaluega o Lafoga (Vaega o le Tiute) ma le Matagaluega o Leoleo ma Falepuipui. Na matauina e le Komiti le

toagaogao o le aufaigaluega lea e aofia ain a o le Ofisa Autu (Principal Officer) e toatasi ma isi alii ofisa e toalua(2).

Na matauina e le Komiti, e manaomia tele la faatautaia o ni asiasiga i Upolu i vaiaso taitasi ma le taulia(2) vaiaso i Savaii ae peitai o le faafitauli, o le toagaogao o le aufaigaluega. E tusa ai o faamatalaga na tuuina ma ii le Komiti, o le mafuaaga lea o le tapunia o nisi o pisinisi faatau ata tifaga ona o le tuai faatino o le auaunaga i le pasiaina o ata a o le i faamaonia mo le faatau atu i le atunuu lautele.

VAEGA O FAAMASINOGA O SOLIGATULAFONO MA AITALAFU:

Na matauina e le Komiti le tulaga lelei o potu mo le faatinoina ai o faamasinoga ae maise ai o le mautu o ofisa mo le Faamasino Sili ma Faamasino e tapena ai mo la latou pitolaau. Na matauina foi le iai faatasi ma le potu mo le faaaogaina e le Faamasino Sili ma Alii Faamasino, Peresetene o le Faamsinoga o Fanua ma Suafa ma le Sui Faamasino Sili. O lea potu tusi na faatupeina i se fesoasoani mai le Malo o Ausetalia. E tusa ai o faamatalaga na tuuina ma ii le Komiti, o nisi o meafale ma isi ea-malulu, na faatupeina lava e le Matagaluega.

Na maitauina e le Komiti o lo o lelei lava le faagasologa o mataupu tau faamasinoga i le Faamasinoga Sili. I le taimi nei, na o le lua(2) lava masina e faatali ai se mataupu pe a tuai ona iloilo e le Faamasinoga ma e leai se atunuu o le Pasefika o lanugatasi ma Samoa i lea tulaga lelei vagana ai le Faamasinoga o Apili.

O le *faafitauli* o le toagaogao o le aufaigaluega. Na taua e le Matagaluega, e oo ma ii le taimi nei e lē i maua mai lava se tali mai le Komisi o le Aufaigalega o Galuega a le Malo i le talosaga ua leva na tuuina atu iai.

Na matauina e le Komiti, e le o faaaogaina i le taimi nei potu e taofia ai tagata solitulafono e faatali ai o latou faamasinoga ona o tulaga tau le saogalemu. E ui lava o ni potu fou, ae o le faafitauli o le vevela e le talafeagai ma le soifua maloloina o tagata e taofia ai.

VAEGA O FAAMASINOGA O FANUA & SUAFA:

Na maitauina e le Komiti, ua na o le Ofisa Sili Lagolago mo lea Vaega faatasi ma Resitala Lagolago e feagai ma le toai atu o le atunuu i mataupu tau Faamasinoga o Fanua ma Suafa. O lo o ave lava le faamuamua mo le atunuu pe a toai taunuu atu. E tusa ia o faamtalaga molimau na tuuina mai i le Komiti, o le masina o Me 2011 le mamao i tua o mataupu o lo o fagasolo ma o se tulaga lelei tele ua iai nei le faagasologa o mataupu a le atunuu.

AOTELEGA:

Na faamaonia mai e le Matagaluega:

- (i) O lo o ave lava la latou faamuamua i le taimi ne ii tulaga tau faamasinoga (Faamasinoga Sili, Faamasinoga Faaitumalo male Faamsinoga o Fanua & Suafa).
- (ii) I le maea ia o le fausiaina o le fale fou mo le Matagaluega, sa le'i mafai ona faatotoga vaega uma i le fesoasoani a le Malo o Saina. O le tele o meafale na faatupeina lava e le Matagaluega faatasi ma meafale tuai sa faaoga muamua a o le i see atu i le fale fou.

ASIASIGA – NOFOAGA AUTU I TUASIVI.

I le maea ai o le asiasiga a le Komiti i le nofoaga autu a le Matagaluega i Mulinuu, na faagasolo ai loa ma lana asiasiga i le Ofisa o le Matagaluega i Tuasivi i le motu i Salafai. I le taunuu atu ai o le Komiti na maitauina ai, e na o Faamasinoga Faa-Itumalo ma le Faamasinoga o Fanua ma Suafa o lo o mafai ona faatautaia ana Tualumaga i Tuasivi.

O le Ofisa fou i Tuasivi na tatalaina aloaia i le Tausaga Faaletupe 2008/2009 e pei ona lipotia mai, ma e fa (4) Vaega o le Matagaluega o lo o faafoeina ana auaunaga e aofia ai:

- (i) **Vaega o Auaunaga Lautele;**
- (ii) **Vaega o Tausiga;**
- (iii) **Vaega e faatinoina suesuega;**
- (iv) **Vaega o Faamaumauga.**

O ia Vaega e fa (4) o lo o mafai ona faafaigaluegaina ai le afaigaluega e toasefuluiva (19), e aofia ai ma le Ofisa Sili Lagolago o Pulega, Resitara Fesoasoani e toalua (2), ma le Ofisa Sinia e toatasi (1).

Na faamaonia mai e le Matagaluega, o lo o feagai foi le Ofisa i Tuasivi ma le *faafitauli* o le le lava o le afaigaluega. O le manaomia o le afaigaluega e aofia ai ma le manaomia tele o ni avanoa faigaluega mo ni Ofisa Sinia. Na maitauina foi e le Komiti i lana asiasiga le manaomia o le toe faalautele o le potu o lo o teu ai faamaumauga ma faial o Mataupu Tau Faamasinoga ona ua vaapiapi le avanoa o lo o i ai nei. Na maitauina foi e le Komiti le faatinoina o le Galuega mo le toe tuufaatasia o Faamaumauga o le Faamasinoga o Fanua ma Suafa (Digitization Project) i Tuasivi.

O le tausia ma le vaaia o faila o mataupu tau faamasinoga mo le malupuipua, o le matafaioi lea a le Ofisa Sili Lagolago o Pulega o lo o i Tuasivi. Na maitauina e le Komiti le manaomia o ni galuega toe

faaleleia i maota o lo o faatautaia ai faamasinoga ona ua afaina le tele o vaega o ia fale. E oo lava foi i faleui e faaaoga e le atunuu lautele, na molimauina i le asiasiga a le Komiti le tulaga faaletonu o lo o i ai ma e manaomia tele le toe faaleleia.

Na taua e le Matagaluega o lo o i ai se fuafuaga mo le toe faaleleia atili o fale mo apitaga o Faamasino Samoa. Na taua foi e le Matagaluega o fale o lo o faaaogaina e le Matagaluega mo apitaga o Alii Faamasino, e i lalo o le vaaiga a le Matagaluega o galuega, Felauaiga ma Atinae Eeseese. E fautuaina e le Komiti, ua tataua ona faasee atu ia fale i lalo o le Matagaluega o Faamasinoga ina ia vave mataituina ma faaleleia ai ni vaega o nei fale mo le Matagaluega aemaise ai o nai Alii Faamasino.

FAUTUAGA:

I le faia i luga o ana Saililiga, e fautuaina ai e le Komiti le Malo:-

- 1. Ina ia toe silasila i le Talosaga a le Matagaluega o Faamasinoga aemaise lava mo le toe faaopoopoina o nisi avanoa faigaluega mo le Matagaluega ona ua maitauina le moomia tele aua le tuuina atu o le auunaga aupito sili ona lelei e le gata mo le tautuaina o Faamasinoga e tolu o lo o i ai nei, ae faapea foi mo mataupu Tau Faamasinoga a le atunuu lautele aemaise lava i mataupu tau fanua ma suafa o lo o molimauina le faatupulaia pea i taimi uma;**
- 2. Ina ia faaaauina pea polokalame faalauiloa a le Matagaluega o Faamasinoga e pei ona molimauina i le Televisi, ma ia galulue faa-paaga pea ma le Vaega o Tupulaga Talavou a le Matagaluega o Tina ma Tamaitai, mo le momoliina atu pea o le feau mo le tetee atu i solitulafono ona ua maitauina pea le faatuputupulaia o solitulafono e aafia ai Tupulaga Talavou.**
- 3. Ina ia tuuina atu i lalo o le vaaiga a le Matagaluega o Faamasinoga fale ma nofoaga o lo o fai ma apitaga o Alii Faamasino o lo o faatautaia Mataupu Tau Faamasinoga i Salafai. O nei fale e pei ona faaaogaina e le Matagaluega o Faamasinoga mo apitaga o Faamasino, o lo o i lalo o le vaaiga a le Matagaluega o Galuega, Felauaiga ma Atinae Eeseese.**
- 4. Ina ia tuuina atu se vaegatupe talafeagai i Tala Faatatau o Tupe i le lumanai mo le faaleleia ai o nisi o Vaega o le Nofoga Tutotonu a le Matagaluega i Tuasivi.**

IUGAFONO:

I le maea ai o Iloiloga a le Komiti, na faaiugafonoina ai e fautuaina le Fono Aoao, ina ia faamaonia:-

1. **P.P.2011/2012 Nu.4, Lipoti Faaletausaga a le Matagaluega o Faamasinoga ma le Faafoeina o Tulaga Tau Faamasinoga mo le Tausaga Faaletupe 2008/2009;**
2. **P.P.2011/2012 Nu.38, Lipoti Faaletausaga a le Matagaluega o Faamasinoga ma le Faafoeina o Tulaga Tau Faamasinoga mo le Tausaga Faaletupe 2009/2010;**

Ma lou faaloalo lava.

FOFOGA FETALAI: Malo faafetai saunoa i lau Afioga i le Sui Taitaifono. Ia, tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te fia faaaogaina le avanoa leni e momoli atu ai le faamalo i le Komiti ma le latou fautuaga. O lea ou te tau tomanatu pe a ma le tolu tausaga talu ai sa faataoto ai i le Laulau a Fono a le Palemene le isi foi fautuaga mo le faaleleia atili o fale ia o le Malo ina ia faasee ese mai le Pulega sa masani ona vaaia ai fale nei i lalo o Matagaluega a le Malo mai lava i le tutoatasi. O le agaga o le tuu atu i lalo o le Faalapotopotoga o Mea Tau Fale, Housing Corporation, ina ia mafai ai ona ese le vaaiga o fale nei ina ia siitia le tulaga o le faaleleia o fale, ae le gata i lea o le faatulagaina o totogi o fale e tatau ona tau tuutuu atu ia ogatasi ma tau o le maketi, ina ia maua ai foi e le Faalapotopotoga seleni nai lo le toatele o tagata o le Malo o lo o nofonofo ai pea lava i ni totogi maualalo. Aua ua leva ona tatau ona tuu i luga i totogi talafeagai e taulalata i mea o loo i ai tau o le maketi. Ma ou te faasilasila atu i lau Afioga ua uma ona faatino le faamoemoe lena, o lea foi la ua toe aumai le isi a latou fautuaga faapitoa mo le faamasinoga, ua uma foi ona tagofia e le Kapeneta le isi foi faaiuga ina ia faasee ese se tasi o fale faapitoa ina ia mafai ai ona faaleleia atili aua le faamoemoe lava lea e tasi mo a tatou Faamasino e malaga atu i Savaii mo faamasinoga.

Lau Afioga, o le mafuaaga lea o lou tulai atu ona ua i ai le suiga lea na afua mai ona o le fautuaga taua na tauaaoina i totonu o le Maota leni mo le suia atoa o lea foi faiga faavae a le Malo ua leva ona sau ai se i tau ese le mea e i ai, ina ia faaleleia atili fale nei e le gata i lena, ae ia tatau foi ona tuutuu atu se i tau soso i le tulaga e tatau ona i ai le totogiina o le nofonofo ai o latou o lo o faaaogaina pea fale o le Malo.

Lau Afioga i le Fofoga Fetalai, o le faasilasilaga lena ma le faaloalo.

FOFOGA FETALAI: Malo faafetai i le saunoaga malamalama a le Afioga i le Palemia e talifuaita ai i finagalo na laga i fautuaga ma iloilogia a le tatou Komiti. Ia, tulai mai le sui usufono mamalu mo Faleata Sisifo.

Tofa Lealailepule Rimoni Aiafi: Faafetai i lau Afioga, e le toe faaalua se manatu i le tatou mataupu. Na pau le mea lea ou te tulai atu ai lau Afioga, ona o lea ua toe tulai mai foi le mea sa laga muamua e lou sui usufono ma le matou Vaega, i le taimi na tapena ai tatou kesi, e leai ma se isi o matou o i ai Lipoti ia e laulau mai. E le mafai foi la ona faia so matou manatu pe a leai ni matou kopi o Lipoti. Ae le afaina lau Afioga, aua o lea e vaai atu e 50 tatou Lipoti, ae le lau atoa mai loa tatou pasia tatou malolo ai loa aua o lea e leai ni matou kopi. Ma lou faaloalo lava.

FOFOGA FETALAI: Ia, tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea lena e faataua ai, a avatu kopi a le tou Itu Agai ona aua lea ona avea i le fale ae tuu ai pea i ina. Ua outou vaavaai mai ia matou, o lea e faitau lelei lava a matou kopi. E lelei foi lena ia atoa ai le tou galuega ma aumai fautuaga e anoa. O matou ua matua galala i se fautuaga lelei e aumai i ina.

FOFOGA FETALAI: Malo. Ia, le sui usufono mo Faleata Sisifo, o lea e maua e le Fofoga Fetalai o lea ua oo mai le Lipoti ne i tauvaleina le Matagaluega faapea e le o mafai ona oo atu Lipoti. O le tatou Fono lea na tuana'i atu nei, na tofu uma lava tatou ma Lipoti na tufaina atu. Ae aua ne i avea ma alofaga faapea ua le mafai ona faitauina a outou Lipoti ona o le tuuese'a o mea ua uma tuuina atu mo lo outou silafia. Ae ui i lea, e manatu o lea ua malamalama le mataupu, e le o se mea foi e fai ai se finauga, e le o se galo moi, o le galo sio.

Tofa Lealailepule Rimoni Aiafi: Lau Afioga i le Fofoga Fetalai, ou te le o fiafia lava i le saunoaga a le Palemia lea na fai mai nei. Ae ui i lea...

FOFOGA FETALAI: Malo faafetai.

Na faamaonia le Lipoti.

FOFOGA FETALAI: E tusa ai ma le Tulafono Tumau 54, e ao i le Malo ona tuuina mai i le Malo se Pepa e tali atu ai i Fautuaga na tuuina mai i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoa le Lipoti.

P.P.2012/2013 NU.35, LIPOTI A LE KOMITI O MATAUPU TAU LE VA I FAFO, FEFAATAUAIGA MA TUPE MAUA I LE P.P.2011/2012 NU.31, LIPOTI FAALETAUSAGA A LE PULEGA O TUPE FAAVA O MALO A SAMOA MO LE TAUSAGA FAALETUPE FAAIUINA ASO 30 IUNI 2008 MA LE P.P.2011/2012 NU.45, LIPOTI FAALETAUSAGA A LE PULEGA O TUPE FAAVA O MALO A SAMOA MO LE TAUSAGA FAALETUPE FAAIUINA ASO 30 IUNI 2009 - Iloiloga

FOFOGA FETALAI: Tulai mai lau Afioga i le Taitaifono o le Komiti o Mataupu tau le Va i Fafo, Fefaatauaiga ma Tupe Maua.

O lea e maitau atu e le o auai mai le Taitaifono. Ia tulai maia lau Afioga i le Sui Taitaifono. I le le auai o le Afioga i le Taitaifono, o le a tulai mai le Sui Taitaifono.

Afioga AFUALO WOOD UTI SALELE (Sui Taitaifono): Lau Afioga i le Fofoga Fetalai, ou te faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

Faaluaina e le sui usufono mo Faasaleleaga Nu.2 ma le sui usufono mo Faleata Sisifo.

FOFOGA FETALAI: Tulai mai lau Afioga i le Taitaifono e faitau Fautuaga ma Iugafono.

Afioga AFUALO WOOD UTI SALELE: Lau Afioga i le Fofoga Fetalai, i le maea ai o Sailiiliga a le Komiti, ua fautuaina ai le Malo e faapea:

“SAILIILIGA:

Na faavaeina faaletulafono le Pulega o Tupe Faava o Malo a Samoa po o le (SIFA) i lalo o le Tulafono o le Pulega o Tupe Faava o Malo a Samoa 2005. O lo o aiaia ai ona tiute ma galuega tauave aemaise malosiaga ua faaee atu i ai le Tulafono. O nisi tiute o le Pulega e aofia ai le mataitu ma vaaia le faatinoga o auaunaga tau tupe faava o Malo o lo o tuuina atu i totonu o Samoa ma ia puipuia le igoa lelei o Samoa e avefa ai ma nofoaga tutotonu mo auaunaga tau tupe faava o Malo.

I sailiiliga a le Komiti na maitauina ai le tele o galuega na mafai ona faatinoina aemaise luitau na feagai ma le Pulega. Ua aofia ai foi ma se faamalamalamaga o tulafono uma o lo o faapea ona limataitaiina ai le Pulega i ona vaega taitasi aemaise faamatalaga tau tupe o le faagaioiina o le Pulega.

i ana iloilogaga na maitauina ai e le Komiti o le tausaga 2008 agai le 2009 na faamauina ai le agai i luma o le tulai mai o le Pulega pea fua i ana tupe maua. E ui ona o le vaitaimi tonu lea na maoae ai le faaletonu o le tamaoaiga o le lalolagi peitai na mafai ona ausia e le Pulega le siitaga aupito sili ona tulaga lelei i ana Tupe Maua. I le tausaga 2009 na faamauina ai se faaopoopoga o ana Tupe Mama i le \$19.8miliona mai le \$15.2miliona sa faamauina i le tausaga 2008.

Ua vaevaeina le Pulega i ni Vaega se tolu ina ia mafai ona maioio tiute o le afaigaluega faapea le tuuina atu o le auaunaga pito sili ona moomia aua le tauleleia o le Pulega aemaise Samoa o lo o maketi atu i ana paaga i atunuu i fafo.

6.1. FAATINOGA O GALUEGA

I le avefa ai o le Pulega ma Resitala o Kamupani Faava o Malo ma Kamupani mai fafo e ao ai ona mautinoa o lo o tausisia lona tulaga aloaia e pei ona atagia i le avefa o le Pulega ma Sui Usufono i nisi o Fono Faava o Malo:-

- Sui Usufono faavae o le Fono a le Resitala o Faalapotopotoga Tuufaatasi (CRF)
- Sui usufono a le faalapotopotoga Faava o Malo e vaavaaia Inisiua (OGIS)

- Sui Usufono o le Faalapotopotoga e Fuafuaina Lafoga Faava o Malo (ITPA)
- Sui Usufono o le Faalapotopotoga Faava o Malo e Vaavaaia Faletupe (OGBS)

Na maitauina e le Komiti le naunautaiga o le Pulega ina ia mautinoa le tuuina atu o le auunaga i le tulaga e faamalieina ai Kamupani ma Faalapotopotoga o lo o faamau faatulafonoina i lalo o le Pulega. Ina ia mafai ona ausia lea tulaga ua vaevaeina ai le Pulega i ni Vaega se tolu:-

6.1.1. Vaega o Resitala/Faamauina

O le vaega lea ua faapitoa i le faamauina po o le resitalaina faaletulafono o Kamupani Faava o Malo, Kamupani mo Vaitaimi Uumi, Kamupani o le Faatapulaaaina o le Soifua, Kamupani Tausi Mavaega Faava o Malo ma isi galuega faava o Malo o lo o i ai i totonu o le Pulega.

O le faamauina faaletulafono o Kamupani ua faaaogaina ai fesootaiga faatekonolosi po o upega tafailagi e faafaigofie ai le resitala aemaise lava i vaitaimi pisi (Ianuari ma Fepuari). Talitonu le Pulega e aoga tele lea faiga ona e vave ma taugofie e faatinoina ai le resitalaina o Kamupani.

Talu mai lona faatoa faavaeina i lalo o le faamalumaluga a le Faletupe Tutotonu o Samoa e 42,228 Kamupani ua resitalaina e le Pulega. E tusa ma le 41,498 Kamupani Faava o Malo, 365 Kamupani mo Vaitaimi Uumi, ma le 365 Kamupani Tausi Mavaega Faava o Malo. O Kamupani ua mafai ona faamauina i le Tausaga Faaletupe faaiuina i le aso 30 Iuni 2009 e 3,307 ma i le Tausaga Faaletupe faaiuina i le 30 Iuni 2010 e 4,204 ua maitauina ai le faaopoopoina pea o kamupani o lo o resitaraina i le Pulega. E USD\$300 le totogi o le resitala mo le Kamupani e tasi ma e tataua ona faafou i tausaga taitasi.

Matauina foi e le Komiti o le Vaega lea a le Pulega e nafa ma le mataituina ma le puipuia o Tupe e Faaofi mai faasolitulafono po o Kamupani o lo o avea soligatulafono ma auala mo tupe maua.

6.1.2. Vaega Faamatalaga Tau Tupe

O le Vaega lea o le Pulega o lo o faafoeina atoatoa ma lelei galuega tau tupe a le Pulega ina ia mautinoa le tausisia o le sao ma le tulaga aloaia lelei o faamatalaga tau tupe a le Pulega i tausaga taitasi. O Tulaga Faataatitia Faava o Malo o Lipoti Tau Tpe (IFRS) ua faaaogaina e limataitaiina ai galuega fai a lea Vaega o le Pulega.

Matauina e le Komiti o le Vaega lea o lo o vaavaaia Kamupani ua laiseneina lea e tusa ma le fitu (7) kamupani tausi mavaega, valu (8)

faletupe faava o Malo, ono (6) faaputugatupe umia soofaatasi faava o Malo ma kamupani inisiua faava o Malo e ono (6).

6.1.3. Vaega o Pulega

O le vaega lea o le Pulega e nafa ma mataupu uma o faafoega faalotoifale ma le pulea o le aufaigaluega. O mataupu tau lotoifale e aofia ai le sainia o lisi o le faasologa o totogi faapea le mataituina o faiga faavae ma fuafuaga e faamalosia ai le faatinoina o le auaunaga ia ausia se tulaga lelei.

6.2. Polokalame Faalauiloa

Na maitauina e le Komiti le faaaogaina ai o fonotaga e fai ma auala e faalauiloa ai le Pulega aemaise o Samoa i atunuu i fafo aemaise lava i Asia o lo o faapea ona tele i ai paaga a le Pulega. i le taimi nei ua avea le lagolagoina e le SIFA o au taalo a le atunuu e auai atu i taaloga faava o Malo e fai ma se tasi o auala e faalauiloa atu ai le Pulega aemaise Samoa i atunuu i fafo. O nisi au taalo na faatupeina e le SIFA e aofia ai:-

- Au Lakapi Manu Samoa
- Au Lakapi Liki Toa Samoa
- Au Lakapi Liki a Tamaitai Fetu Samoa
- Faalapotopotoga Tenisi a Samoa
- Softball Samoa Inc ma isi...

Sa mafai foi ona faatupeina e le Pulega ia Taamilosaga Taga Polo (Samoa Open Golf Tournament (SIFA) aemaise le saunia o faailoga tau taaloga mo le Lakapi Iuni a Samoa.

Na maitauina ai e le Komiti le naunautaiga o le Pulega ina ia siitia le tulaga o le tomai o le aufaigaluega ma o lo o maua avanoa e auai atu ai i polokalame o aoaoga faavaitaimi i atunuu i fafo mo le faalauteleina o le tomai. I lea tulaga ua faia ai foi e le Pulega ni auala e faatumauiina ai le aufaigaluega mai le tuua o le SIFA ae agai atu mo isi galuega. O se tasi o auala o le tuuina atu lea o le avanoa e faia ai e le aufaigaluega ni nonogatupe mai le Pulega i le tului e 6 pasene.

Na faalia le agaga faafetai o le Komiti i le Pulega ona o galuega faatino ma matatia na mafai ona ausia aemaise tulaga aloaia faava o Malo o lo o limataitaiina ai le Pulega ma ana auaunaga.

FAUTUAGA:

I le maea ai o Sailiiliga a le Komiti, ua fautuaina ai le Malo e faapea:-

- 1. Ia silasila i ni auala e mafai ai ona fesoasoani atu i le faatosina mai o Kamupani ma Faalapotopotoga mai**

atunuu i fafo e faaaogaina le auaunaga a le Pulega o Tupe Faava o Malo a Samoa.

2. **Ia silasila toto'a le Pulega, ina ia mautinoa ma mausali le saogalemu pea o Samoa mai le faaofiina mai o tupe i ni auala faasolitulafono.**
3. **Ia tausisia aiaiga faaetulafono mo le tuuina mai i le maea ai o tausaga faaletupe taitasi o Lipoti Faaletausaga a le Pulega (SIFA) aua iloiloga a le Palemene.**

IUGAFONO:

I le maea ai o Iloiloga a le Komiti, sa faaiugafonoina ai e fautuaina le Fono Aoao,

Ia faamaonia le P.P.2011/2012 Nu.31, Lipoti Faaletausaga a le Pulega o Tupe Faava o Malo a Samoa mo le Tausaga 2008 & P.P.2011/2012 Nu.45, Lipoti Faaletausaga a le Pulega o Tupe Faava o Malo a Samoa mo le Tausaga 2009.

Ma lou faaaloalo lava.

FOFOGA FETALAI: Ia, tulai mai le sui usufono... Oi, ia malie lava le sui usufono mamalu ona e manatu atu o lea ua tatou tini tauao i le tatou taimi malolo o lenei aso...

Tofa Lealailepule Rimoni Aiafi: E puupuu lava lau Afioga...

FOFOGA FETALAI: E le mafai foi ona faatopelauina lou finagalo e anoa tele ou manatu. Ae o le a e ta muamua i le taimi a taeao pe a tatou taliu mai. Ia leaga o lea ua tatou taunuu i le tatou taimi malolo. Ua alu foi lenei aso o tatou faaaaogagase i le tatou Fonotaga mai lava i le taeao seia oo mai i lenei vaega o le taeao na liugalua. E momoli atu ai le agaga faafetai tele i le tatou Maota i le onosai mai, malo le usufono, malo le lagapapale, malo foi i fautuaga ma mea uma ua tini tauao ai le tatou Fonotaga i le faaiuga o lenei aso. Ona ou manatu lea, ua tataua ona fai se tatou malologa.

Ae tatou te le i malolo ou te valaau atu i le sui usufono mo Falelatai ma Samatau, ia, tulai maia lau Afioga i le Aoao o le Ekalesia malosi po o lau Afioga i le Faatonu o le Matagaluega o Faamasinoga e fai se tatou tatalo e faauma ai lenei aso ona tatou tolopo ai lea.

Tatalo.

Na motusia Felafolafoaiga ina ua tolopo Taulumaga a le Fono Aoao i le itula e 1:00 i le aoauli seia aulia le itula e 9:00 i le taeao o le Aso Lulu, 9 Oketopa 2013.